

章氏會譜德慶四編

卷三之卷四

上海图书馆

登记号码

JP000000036

章氏會譜德慶四編卷之二

會稽章貽賢輯撰

工部都水司主事貴池章南湖先生傳

柯榮

先生諱永祚字錫九號南湖池之湖村人也先世自建州遷池之白沙數傳遷郡南湖之岸居焉因取以自號父諱世德學貫古今品高行潔康熙壬戌進士任閩之南平縣善政宜民二歲餘卽殂落南邑紳士呈請立祠奉祀感德不衰池之人亦復請祀鄉賢時先生已登賢書上承家訓嗜古立名且曾隨任南平親炙贈公政績益篤志勵學冀得步武禮闈復列進士科乃辛未甲戌丁丑三科房師朱彭二公三薦三躋康熙四十九年二月吏部銓授陝西清澗縣知縣甫下車視學卽捐俸葺修殿廡振興文教觀風課士先重品行次講文藝士習爲之一變縣多流亡逋賦先生招集撫綏勸以耕種民漸復業又議編審法以蘇徭役運邊米以實倉儲凡捍患養民之政次第施行漢司牧之賢者推先生爲最皆本贈公訓也迨後三署延川並以治清者治之前後統計八年人稱循吏康熙五十七年大吏舉薦政績奉旨行取以勵賢能時方用兵征額魯特先生奉委押解軍駝出關遠逾沙漠馳驅萬里艱苦備嘗在途吟嘯自得絕不以內陞縈懷任清澗時嘗買軍騾百頭解赴甘州軍營調出榆林

口以資軍用武功載纘不獨文治光昭而已越四載差竣入都補行引見奉旨以主事候補時康熙六十一年也雍正二年御試高等補工部都水司主事先生以河工估銷錢糧不免浮冒河帑逐年積欠輸解不前疏請宜核實稽查分案清理以除積弊悉稱上意時先生母夫人年近九旬先生嘗以遠宦邊陲不克侍奉庭幃爲憾至是陳請終養奉旨俞允自此瞻依膝下賦詩見志纏綿悱惻忠孝無慚先生雖歷官內外兩世簪纓視其家則田不數畝屋不數楹晚年貧不忘樂陋巷簞瓢晏如也先是都中無池屬會館先生官京曹之日倡議建造遊宦商旅咸得依庇並立義塚俾旅歿京都無力搬柩者獲瘞阡所補齊華文恪兩先生義舉所未備池郡文廟傾圮時適先生告養歸里呈請太守吳公籌款修葺廟貌一新並就上清溪更衣亭故址建黃文貞公祠以祀之俾士子有所矜式已故邑令岳公式南爲當時江南第一清官歿後葬於池州荒煙蔓草日就淹沒先生欽其廉正每遇寒食節備酒餼祭於墓下命僧看守以表循良至於族內則仿范文正公義田之制在里中按朱文公社倉之法公捐田租儲倉遇青黃不接及族內之貧乏者分別賑貸以時收放使闔族無啼饑號寒比戶有緩急可恃凡此數端其所以爲桑梓宗族計者至周且備至今後人格守勿替某生也晚不獲見公其善政懿行膾炙人口有不容泯滅者今綜所聞

而爲之傳將備國史之採不僅傳示其子孫已也

誥授奉政大夫江南外河同知會稽鑑耕公傳

公姓章氏諱應奎字聚五晚年自號鑑耕世爲會稽道墟村之前莊人祖諱必遴父子卿皆隱德弗耀子卿公家貧刻苦自守處之坦然公讀書未卒業卽隨其外舅倪某習幕爲謀生計初甚偃蹇迨佐鄆陽幕始有知者後徧歷山左河南江南各省所至名公卿皆倒屣相迎居幕府二十餘年遇事詳審慎密有可挽回處必悉力救之年五十經東軒高相國於河督任內疏薦授江蘇高郵州州同遷高堰通判尋丁母憂去任服闋補原官旋陞外河同知時年已杖鄉矣公常以知足不辱知止不殆爲戒遂決意告歸越數年河工獄起同官者或戍或謫公以退居林下獲免論者咸服公知幾子卿公在日嘗諭公曰貧宜安命富宜推解祖宗木本水源斷不可忘公秉承遺訓且慕宋儒范文正公之爲人每謂族大者人衆榮獨所不免資周恤而圖久遠莫善於義田吾族闕焉未舉平地一簣吾當勉爲之爰置田一百二十畝有奇捐入道墟前宅宗祠以贍宗族男婦之無告者自是族內有力之家皆慕義興起陸續捐田附祀故至今共有田八百餘畝爲山會兩邑各宗祠之冠公實始基之焉公又云子弟以蒙養爲急自八世祖稷南公居前莊派下子孫大率式微復捐田二十餘

畝歲獲租息爲延師脩膳之資並建義塾於稷山之陽以教族內子弟勒石以垂不朽厥後星石公另捐墟里學田五十餘畝穗書公以其別墅捐爲義塾雖各行其志實公有以啟之乃知天下事有開必先也公既創成義舉又以稷南公以下祭產不豐捐田數十畝各爲增益蒸嘗以補五服內子弟之有才者爲援例納粟服官若貧而無依則娶妻給田予以溫飽其篤於親誼如此乾隆二十年秋風潮爲災越中大饑斗米三千內外當事邀議賑救公首捐三百金爲一邑創同時長漚有宋伯侯者因家無餘資揭債鬻產以拯鄉人蓋爲公所感動也公在河工久熟悉工程公正交推徐家堰海塘圯當事邀公董修臺檄建宋家澗石塘郡守復聘請主辦工竣有裨桑梓乾隆二十三年公年六十九以所生一子繼綸號竹溪天亡辭名繼賢僅遺一孫後妾生子名六十四年俱幼豫書遺囑叙其一生所歷甘苦以示子孫大意自謂承先人遺訓畢生努力幸得無墜家聲所望後勁得人善繼吾志世俗薄於倫常輕於仁義皆爲財帛所誤要知貧富由天逆天悖理非徒無益用一分機詐壞一分心術行一分刻薄減一分福澤人苦不自知耳吾子孫苟能讀書明理與於文人正士之列始爲成器光宗耀祖方得爲孝子賢孫若世俗執親喪延僧道作佛事名之以超度美之以孝順謬誕極矣公孫名晟湖北候補道庫大使署蘄水縣縣丞護理襄陽同知

能繼公家聲

府志官績
傳參遺囑

文林郎翰林院庶吉士錢塘藻功公傳

公姓章氏諱藻功字豈績錢塘縣人父諱士斐明季諸生事母至孝生子三公其季也家素貧少習舉子業與兄勘功撫功並承士斐公家學以詩文擅名於時俱稱於柴省軒先生當日兄弟有建輪拔戟同爲莪苑雄師之目公師陸拒石尤工駢體康熙壬午舉於鄉癸未成進士官翰林院庶吉士在官僅五閱月卽引疾歸奉母終身闔戶著述有思倚堂集傳於世其爲文貫穿經史牢籠百態往往擲石作金石聲所述祖母高太孺人傳士斐公遺集後序不啻李令伯陳情表歐陽永叔瀧岡阡表讀之使人低徊於邑不能自己間作詩歌亦得風雅指歸其座師傅作楫與楊自西侍郎嘗謂公言詞慷慨意思高邁雖藜藿弗充一意著書爲樂至性過人事親孝事兄恭與人誠蓋非獨文章之士也初卜居橫河橋作息廬小序後又作信園賦云園在居宅之旁宅南爲佑聖觀又丈許爲巡鹽御史官署因士斐公嘗著有花隱亭遺集故園中仍以花隱顏其亭云

杭州府志參
輯兩浙輶軒錄

勅授脩職郎樂清縣教諭族兄恕齋先生傳

蘭谿肇敷

先生諱騶字爾符號恕齋系出宋丞相郇國公之後世居蘭谿之純孝鄉曾祖諱尙

學明萬歷間進士歷官通政使左叅議祖諱某父諱某先生幼穎異稍長從游姜白竹先生之門深器之弱冠後受知於學山顏先生遂補邑弟子員次年丁丑舉行選拔學使石虹張公評閱先生卷謂有光昌之氣蔚爲國華貢入成均一時蜚聲都下儕輩咸以大器期之大司成堂課屢置高等奈以數奇艱於一第憐才者皆爲扼腕而先生澹泊寡營旋即告歸諸先達祖帳都門贈言留別在京時與高安朱文端公同居沈學士辰垣門下聯床數月意氣相投後朱公巡撫吾浙有綈袍垂戀之意而先生風致自高不屑折節投刺家居四十年飯一盂蔬一盤左圖右史晏如也生平喜飲酒親舊相邀飲輒醉然絕不吝情去留儼有靖節高風今上御極搜羅遺逸遂以教諭司鐸樂清庠士共仰山斗凡經品題無不有聲庠序有不率教者從容告誡亦皆革心向化郡守莊公重先生品學忘分下交蓋優等相待也耄年告休囊無餘積清標介節嘖嘖士林先生秉質高曠待人不設城府一以誠意相感其宏才碩學宜膺高科乃年未強仕卽退居鄉井不復應試晚歲司教樂成不久引年致仕而終樂邑士子感其德教立祠祀之數辱游門墻知先生最深今因續修宗譜不揣固陋而爲之傳以誌高山景行之意云爾

乾隆二十八年
蘭谿贈

誥授中憲大夫鴻臚寺少卿歸安莫山公傳畧

公諱寶傳字習之號硯屏又號塹山姓章氏世爲歸安人父諱有大雍正庚戌進士
歷官禮科給事中公自幼讀書穎異年弱冠遞補廩膳生中乾隆戊午科舉人壬戌
成進士歷官內閣中書宗人府主事吏部稽勳司員外郎記名御史升考功司郎中
因公降補工部虞衡司主事轉戶部山東司員外郎吏部文選司郎中授福建道監
察御史禮科掌印給事中升鴻臚寺少卿歷充軍機章京丙子科順天鄉試同考官
寶源局監督四庫館提調巡視中城文淵閣校理誥授中憲大夫卒公幼承庭訓學
有本源通籍後與給諫公先後同垣其以御史記名也給諫公諭以臺諫風規所宜
自峻清要美名居之不易他年涉歷台階當思稱職父子間自相勗勵如此壬午春
公隨駕南巡給諫公迎鑾至杭蒙恩命隨侍假旋願遂趨庭海內榮之假滿仍回京
供職嗣聞給諫公因連抱手足西河之痛體氣漸衰稟請歸省給諫公誠以移孝作
忠之義公不敢違命勉盡職守迨聞給諫公逝世星奔南歸襄大事誠信備至服闋
還京洊陞卿貳暴值樞垣駸駸大用惜年僅五十而歿行述不傳故生平事蹟多湮
沒不彰茲就見於家乘者畧著梗概而爲之傳公著有蘆江詩存列郡志藝文略登
湖海詩傳兩浙輜軒錄嘗與閔晴岩同舟出都唱和詩有云經義有誰堪作僕詩名
原是不論官蝸同莊叟憐渠鬪鶴異羊公任客觀以給諫公成進士未大用故云配

閔氏誥封恭人子二紹曾彥曾紹曾乾隆辛未科副榜署東陽縣訓導著有筠圃小草
荻江贈

文林郎國子監典籍稽實齋章公傳

譚廷獻

章先生學誠字實齋會稽世族生而質魯賦稟瘠弱少入塾讀書百餘言猶亟亟不赴程已而日親墳籍不樂事章句少長披覽子史識去取久之洞明著作之本末交餘姚邵晉涵氏益推究古近史家之學嘗出游客馮兵備廷丞所與休甯戴震江都汪中皆兵備所敬禮而所學異趣先生學長於史嘗謂六經皆史書與春秋同原詩教最廣太史陳之官禮制作與大易之制憲明時聖王經世之大皆所以爲史也以故秀水鄭虎文推先生爲良史才成乾隆戊戌進士官國子監典籍恒就南北方志之聘創州縣立制科方志立三書議世未能盡用也畢尙書沅總督湖廣延撰湖北通志書成而論者詆媿先生條辨之今所論定和州永清亳州天門諸志或傳或不傳而湖北通志亦非先生之舊矣論課蒙學文法略曰使孺子屬文雖僅片言數語必成其章當取左氏論事君子設辭熟讀而仿爲之孺子能讀左傳者未必遂能運用今使仿傳例爲文文卽用以論事是以事實爲秋實而議論爲春華矣左氏春秋稱述易書詩禮孺子讀經傳而不知所用則分類而習其援經證傳之文辭擴而充

之根柢深厚初學先爲論事繼則論人論事之文明暢疏通知遠本於書教論人之文含蓄抑揚咏歎本於詩教纂類左傳人物而學論贊必讀司馬遷書遂使孺子因論贊而畧知紀傳之事因紀傳而妙解論贊之文論人之功既畢則於左氏春秋之業思過半矣童孺知識初開甫學爲文必有天籟自然之妙非雕琢以後所能及也譬若小兒初學字畫時或近於篆籀非工楷以後所能爲也迎其機而善導參之以變化故自論事論人以下諸體迭變復又使之環轉無窮所謂一尺之捶日取其半而終身用之不竭也與友書畧曰考論人物向爲同志商定條例曾刊印格標爲讀史年譜旁行十道首行甲子次行紀年凡涉十年年甲一板如唐三百年三十板足矣前後空編甲子三數板俾生隋時卒五代時之人皆竟顛末餘史均可類推其人止載姓名生卒年月下注某紀某傳篇名出處則翻閱時一切考證均可照注自尋本文若兼載他事則例不純而功亦難竣外戚列女隱逸才技姦臣佞幸凡見史策中者無一不收至於紀年之法正統偏安均照各史編年如三國志各自爲書各編譜首各分年甲各注本國之人可矣僭竊載紀其國並無本史然後以十六國仍晉年九國仍五代年既以讀史年譜爲名分合之例一以本史爲斷可也先生文不空作探原官禮而有得於向歆父子之傳每一篇成恒寫寄友人人間傳錄多有異同

所撰通義數十萬言嘉慶辛酉先生卒時曾以藁草寄蕭山王宗炎爲次目錄道光壬辰次子華紱寫定文史通義內篇五卷外篇三卷校讐通義三卷刻於大梁譚廷獻曰通義寫本得讀於廈門大梁板刻浙東兵後獻渡錢江訪得於會稽周氏祠堂亦闕佚矣出篋中舊本補刻於杭州書局印行廣州有伍氏叢書本近歲後裔又重刻於黔於是來學日開遺書津逮矣獻所得遺藁一二未刻雜篇要刪如右庶幾布之章氏家塾四方承學就傅之士以時興起云爾

復堂存稿

誥授奉直大夫江南兩淮鹽運司運判果亭章公傳

山西學政莫晉

公諱秉鈞字翊仔果亭其自號也先世信四十二位自稱山分支遷於邑東之新建莊越八世祖予華公積仁累行子姓蕃昌蔚爲望族父樂園公生五子公其季也生而穎異束髮授五經輒瀾翻成誦弱冠應舉業不偶純皇帝御極之八年詔中外懷才未試者俾及時自効於是樂園公命公報捐授官鹽運司運判十一年籤掣江南旋署兩淮通州分司事公到任後謝請謁絕苞苴釐奸摘弊鹺務肅清制府尹公繼善廉公長於吏材極加優禮方將大用而樂園訃至公徒跣歸里服闋後當道咸勸公補官而公以母老辭板輿奉養獻壽稱觴盡子職者二十餘年而公亦髮垂垂白矣庚午恭逢覃恩公請於朝封父祖二代如公官己亥特恩加一級晉階奉直大夫

兩膺錫命誠異數也公器宇宏深禋躬肅括解組後操持家政與諸昆倡建宗祠剏置義田善行不可枚舉先是邑東多水患每當秋深霖雨兼旬之際颶風大作江潮陡發山會田禾百餘十萬畝率成巨浸公愀然曰越地土瘠民稠任聽河伯爲祟田卒口口吾桑梓何以裕蓋藏乎於是請於邑令彭公元璋曰越地濱海正對日本大洋東北風發則數千里之潮風力助之前潮不及退而晚潮又進潮高於海數丈吼怒澎湃直趨山會蕭山上虞數邑而會稽獨受其衝爲害尤鉅夫爲堰爲閘者利在宣而洩之爲塘爲隄者利在障而遏之余觀曹娥蒿壩兩處負山襟海其塘可築而捍也彭知公能勝任悉以委公公相度地勢鳩工集役或有梗其議者公毅然不顧畚鍤大興耜趾具舉閱歲工竣民乃歌子產焉是役也公暨諸昆慷慨樂施所費幾及萬金迨郡伯李公亨特採訪得實語載紹興府志中公狀貌魁梧天性敦篤無疾言遽色處己以嚴御下以寬待人以恕勗子以勤甲辰郡守興公延諮耆碩以充鄉賓郡人咸推公爲首薦正月既望揚擘笙歌介僕畢集禮也晚年構宅於西偏爲菴裘計蒔花種藥掃地焚香頽然將終老焉公體質強健年逾七十視聽不衰或懷古而臨風或攤書而負旭優游歲月杖履逍遙正資頤養而天不憖遺於乾隆丙午年十月十八日以疾卒於新建莊之西第享年七十有二配任氏誥封宜人早卒子十

人忠淇忠潞忠湄忠淳忠潢皆任宜人出忠洲忠濱忠澄皆箴室劉孺人出忠瀾忠清皆陳氏出孫三十七人嶄然悉露頭角嘉慶癸亥四月合葬於五湖之原自余爲諸生時聞公居鄉事甚稔嘗以未見顏色爲憾今服官朝右近五載忝爲姻戚嗣君輩寓書京邸丐爲家傳余雖不文不可以辭爰撮叙大畧以應之

府志列義行

山陰故孝廉逢之章君傳

孫星衍

君諱宗源字逢之姓章氏浙江山陰人以兄編修宗瀛官京師遂以大興籍中式乾隆丙午科舉人少聰穎不喜爲時文以對策博瞻發科益好學積十餘年采獲經史羣籍傳注輯錄唐宋以來亡佚古書盈數篋自言欲撰隋書經籍志攷證書成後此皆糟粕可鬻之然編次成帙悉枕中秘本也又言輯書雖不由性靈而學問日以進吾爲此事久之亦能爲古文爲駢體文矣又以今世所存古書版本多經宋明人刪改嘗恨曩時輯錄已佚之書不錄見存諸書訂正異同文字當補成之其已輯各書編次成帙皆爲之叙通知作者體例曲折詞旨明暢古書多亡於北宋故輯書始於王應麟近代惠徵君棟踵爲之四庫全書用其法多從永樂大典寫錄編次刊布甚夥至於君則無書不具焉時都門廣慧寺有妖僧明心者誑人以符籙降鬼挾仙凡言禍福又賄客僕從刺探隱事面發之示神驗京朝官之佞佛者大爲扇惑爭饋貽

之僧益豪橫或占人墳塋作廟基或權子母取重利事敗僧以罪遣歸南中君等以事佛與牽連罪斥不能復與會試僧人潛出游齊魯間就大吏之不潔者納賄遣易姓名捐職丞倅出入詭秘甚而君等猶信之持長齋且寓書屬予去所爲三教論者予著三教論時京朝官惑於妖僧曰甚因以曉譬之大吏某曾倚上官勢屬予去其文不得及得君書戲云君以生平輯錄書付我我卽去此文君必秘愛不忍割是色空之說不足恃也然君好學之志終不衰性恬澹不肯干謁亦異乎世之所謂禪鑽者以嘉慶五年某月某日疾卒於京邸撰隋書經籍志及雜文若干卷

舊史氏曰惜哉章君之好學而惑於釋氏也既輯錄三代先秦古書豈不知佛書出東漢六朝之不足貴并非西域浮屠之所秉筆耶及爲妖僧誣誤猶以素食終身年未五十而溘逝釋氏之效安在哉或言章君死時神清明無所苦此何益且反常也孔子大聖寢疾七日曾子大賢反簣未安徂歿之痛達人不諱儒者身備四氣哀樂反常豈非皆中節之學乎傳曰未知生焉知死又曰大哉死乎君子息焉小人休焉儒通天人勿可尙已

五松園文集

錢塘庠生章南垞先生傳

陳鴻壽

先生姓章氏諱晟字曜鳴自號南垞亦曰竹亭世爲會稽道墟人族最繁衍遷吾杭

武林門外之散花灘遂占籍焉先生在髫齡中卽露穎異讀書蔡氏五桂堂下筆爲老成所驚賞弱冠補弟子員秋賦屢薦不售人惋惜之先生泊如也繼游皖江應天府聘經大小孤山登采石磯攬勝懷古激昂感慨詩篇間作與大江南北諸名士相角逐復之齊魯間所至爲守令聘掌書院事擁皋比譚藝無勸容誘掖後進多所成就貧士必倍其膏火輒自割束脯與之不以私謁而遇政事利弊所關必力爭之或以詩微諷之皆改容謝謂先生爲君子人也某縣值歲侵當賑濟先生博考採荒之典諄誠大令實力舉行全活者不下數千人嘗宿臺庄工次隣人不戒於火卒無損失類有神護持者益信宅心仁厚之所致也嗚呼利澤及於世名聲施於時又何待假尺寸之柄而後盡其能事耶先生生男子有三曰朔墉達皆能承其學挈之出遊以最幼者隨侍長與次各佐幕郡邑先生恒以敦品力行郵勗之又疏官箴二十四條使各導其所主者故聞名願納交者恐後而先生倦於遊矣南歸後僦居城中西北隅布衣竹杖以詩酒娛老懷所著有自怡軒詩詞稿又四年以疾卒年六十七嘉慶癸亥九月二十五日也

陳鴻壽曰余嘗北游道經濟陽坐臥珍珠泉上累月聞吾鄉有章君南垞其人者行至高學亦遠心識之以不得一見爲憾事今因哲嗣之請爲先生傳余焉足以傳先

生哉亦先生有以自傳而不可湮沒者在也

自怡軒集

誥授中憲大夫山東運河兵備道富陽質菴公傳

公諱輅字乘殷號質菴系出浦城太傅仔鈞公後有諱允文者於宋崇寧間官杭州通判因父寶文閣待制衡公之墓在杭遂遷居富陽之大源里曾祖諱欽文國初由歲貢從戎歷官河南巡撫誥授榮祿大夫祖諱縉歲貢生任宣平縣教諭父諱樹漢邑庠生均以公貴贈中憲大夫祖母陳氏母蔣氏朱氏俱封恭人公自幼失怙年十四遭朱太恭人喪嗣伯兄行夏又故家貧不克終事誦讀乾隆丙寅年甫冠卽赴江南邳睢同知幕習河務於文牘外凡河工修防諸法靡不悉心考求下至老吏弁兵亦多方諮詢如是數年熟習河務聲譽日起歷就院司各幕均資運籌戊寅春遵例報捐從九品選用庚辰經河東河道總督張懋敬公師載以公辦事明練疏薦引見蒙恩發往河東河工差遣委用四月到工派往豫省廟工防汛建議揀堡夫拔河兵定水誌濟運道諸事俱採擇施行辛巳七月河南楊橋漫口時公在濟甯調赴工次乘騎晝夜兼行足爲腫潰到工籌畫堵築事宜歷三月餘工竣功居一等獎叙紀錄補河南祥符縣南岸主簿次年三月到任甲申十月舉行計典保薦卓異是年冬署湯陰縣縣丞歷任山東東平州州判德州州同兗州府捕河通判運河同知乙未十

一月奉委護理運河道四十一年丙申正月隨河帥赴直隸迎鑾二月奉旨補授山東兗沂曹道旋奉調補通省運河兵備道丁酉恭逢覃恩封贈父祖均爲中憲大夫祖母與母俱封恭人戊戌夏因天旱汶水斷流湖立漸涸用併帑積水法閱五日東昌至臨清百二十里水深七八尺衛河無閘者捐廉排築板壩分別蓄水直隸故城清河一帶亦俱倣行將米按帑起交撥船兌運使糧船騰空長行費省而米不耗弁丁皆樂於奉行是役也公在炎天烈日中往來籌辦百餘日事竣回署積勞疾發遂患鼻淵而豫省祥符儀封先後失事奉調赴工督催又奉飭勘東省大挑煞壩工俱力疾從事己亥元旦謁廟歸而鼻淵大發頭暈目眩旋復氣喘公以久病不能辦事恐負職守屢稟求退經河帥入告奉旨准其回籍調理十月卸事回浙寓居嘉善城南荷花埂公自任汛防益究心河務又嘗循行兩岸窮源竟委黃河全局成竹在胸其河運水道各閘啓閉蓄洩有關民生利病者無不隨地隨時殫精竭慮相機策應動中竅要歷任河漕各帥倚如左右手凡有大工無役不從數載之中兩覲天顏在水營領繹之日蒙恩頒賜克食迨積勞成疾告病歸田乾隆庚子翠華南幸特遣太醫往視蓋異數也公感激思奮以年力就衰不克再出任事爲憾任東平州判時汎內安山湖舊有柳園地二十餘頃由州判僱夫耕種藉資津貼乾隆丙戌秋稼正茂

將次刈穫適大雨連霄運堤出水僅寸許公督夫加築子埝巡至上游千總汎堤土工係浮沙隨幫隨塌危險萬分公察看安山湖向有通河廢閘急令人夫挑通宣洩河水陡落三四尺運堤穩固民田得資保障而柳園垂熟之禾均遭淹沒其顧全大局如此濟俗貧民無力乳養嬰孩輒棄城根僻處爲犬豕傷殘公護運河道時於西門外五勝街構屋數十椽作爲育嬰堂派員經理收養遺棄嬰孩募貧婦乳養並捐廉銀千兩交州發典生息按季解道爲經久計居家孝友痛伯兄早亡初就館卽將修脯贍養嫂姪迨後其姪述祖讀書完娶及服官豫省皆公一手提携先是公會祖中丞公居官清廉歿後柩厝淮安無力歸葬曾祖母楊太夫人葬邑後小影山墓亦失查公在運河同知任內請假扶櫬回籍訪楊夫人墳墓與祖父母及伯兄合葬本村並捐置中丞公祀田廿三畝零義倉穀二百石交宗祠董事經管子孫領錢辦祭永以爲例其餘內外親屬有力難安葬者分別資助營葬堂兄大有貧無所倚資給養贍終身每遇水旱米價增漲與各紳按莊減價平糶高祖以下有服近支按口量給錢文其篤於親親又如此嘉慶十六年五月十九日卒年八十五原配林氏繼配曹氏再續楊氏均封恭人合葬五行涇方家村子三其一光祖山西候補同知公有自著年譜一卷具載治河方畧可爲後人取法云

勅授文林郎山東博山縣知縣伯考純浦府君傳

山陰書燧

府君諱玉輅號阮川字純浦曾大父諱振禮大父諱大本皆隱德弗曜府君爲大父長子幼穎悟九齡入塾讀四子書卽解習儷語塾師出課難其對應若響族先輩奇之曰是必能亢吾宗者及冠訪名師負笈赴郡與仲父虞琴季父瑄舟俱游潔園先生之門風雨蓬窗雁行唱和極盡怡怡之樂府君府縣試曾考列第一未獲雋嗣以古學麥秋賦爲學使少宗伯全公所識拔遂補博士弟子員次年爲乾隆乙酉科卽舉於鄉公車北上大父期望甚切以盼捷音致疾歸卽捐館舍府君以平日求學故出游日多承歡時少至是毀瘠甚服闋赴京再試禮闈冀得捧檄以慰大母心然屢躡南宮艱於一第會大母病痢壽終府君聞訃星奔南歸抱恨終天更甚於大父時營葬旣畢起復入都供役四庫館全書告成議叙以知縣分發山東補用授博山縣知縣嗣調益都縣再任商河均有政聲門絕苞苴凡遇訟案兩造對簿聽斷明決民有神君之頌然存心慈祥不肯輕施拷撲有過惟薄責示懲恒不滿杖也平日待士極厚每遇書院考課及縣試悉心校閱取去公允士林德之調充乾隆戊申科鄉試同考官得士稱盛會遇計典大吏保薦卓異引見候陞府君歷任繁劇爲政不事表暴惟以愛民爲本故所至均有聲績居官尤講求操守平時除應得廉俸外未嘗妄

取一錢而家故不豐父輩析居後每屆年終府君皆有分潤宗黨之貧乏者亦各按等次量力周卹故在官十餘年囊無餘蓄惟琴書一室而已以夙夜勤勞竟卒於官旅櫬旋歸同寮輓送有三千程驛路口盡哭孤舟之句其清風亮節概可知矣燿自先考棄養後府君卽招至任所課以詩書日侍左右於公退之暇每訓以立身居官之要迄今二十年自維無能僅以恩貢就職直隸州州判候選不克副府君期望追念訓誨爲之黯然配伯母徐氏生五子書珪書墀書臺書壇書筠書珪早世三四兩兄俱以縣尉分省補用能承府君志勵廉隅云贊曰學優則仕出處咸宜經生廉吏非公而誰膏澤滂沛齊魯謳思豐儀偉幹今猶見之

誥授昭武大夫署四川慶寧營都司崇祀昭忠祠欽州法之公傳

公諱憲字法之原名爾珣姓章氏先世居浙之新昌縣三都祝萬莊有諱瓊者於前明成化年間官廣東潮州通判遂爲欽州人祖諱啟相父諱殿巒生三子公其仲也生而瑰偉有膽畧由行伍於乾隆四十年拔化石營外委四十二年擢欽州營把總四十七年升千總五十七年遷四川督標左營守備五十九年署慶寧營都司嘉慶元年湖北教匪猖獗公奉調赴營隨征長陽來鳳巴東各縣賊寨搗穴擒渠所向克捷是年十月杪匪竄陝西漢中鳳縣一帶屯黃柏山特險負嶠其西北有老米山高

約萬仞一線盤上可通賊巢公隨總督福凝由小簿道嶺連攻數次不能得手復分兵繞道攻簿道嶺山尾奪卡二座總兵諸神保又從地口撲上賊卡拋擲火彈燬其屯糧乘勢四面仰攻賊墮岩死者無算遂抵老米山麓攀籐附葛魚貫而上出賊不意奮勇攻擊戮斃甚夥餘夥大潰奪其三卡其第四卡高據山頂更爲扼險公帶兵前進仰面上攻奮不顧身迭殲多匪身被刀石各傷無算竟亡於陣實嘉慶元年十二月三十日也年僅四十九歿之日士卒莫不流涕總督尤惜其材事聞蒙恩賜卹如例入祀昭忠祠賞雲騎尉世職襲次完時以恩騎尉世襲罔替子式成承襲雲騎尉世職由欽州營千總迭次捕匪出力累陞新太協副將署左江鎮總兵以廉潔稱

耆獻類徵
參欽州譜

誥贈武功將軍江陰縈波章公傳

湯金釗

自來聳霄昂壑之材無不藉封殖栽培之力班范之史於勃焉而興者各詳其鍾祥儲慶之源如于定國袁閔何敞諸傳尤爲明著非以爲誇耀也人情莫不愛其子孫而由斯道以厚門基裕後昆固有信於孚卵而捷於桴鼓者吾今又驗之江陰縈波章公矣章氏系出浦城五代時有太傅仔鈞生子十五人皆貴顯石林燕語載其事謂是練氏夫人反旗却帛全活建州一郡生靈所致則章固以陰德著望者也太傅

八傳至宋宣教郎建始占籍江陰世擅清門隱而未曜又十九傳爲邑庠生誥贈武功將軍文煥則公之考也公生甫十月而贈公卒母趙太夫人茹荼撫孤公幼稟母訓克自樹立學爲制舉業不得志因究韜略習騎射年二十二補縣學生思以材武起家而生計簫索無以慰母氏則又從事於猗計之術重然諾尙氣誼時往來江淮湘漢間計贏課虛業日益廣閱十餘年而居積大饒遂一意孝養無復輿檣四出矣方公壯時多膂力意氣無所挫好面折人非然一聞母呼則長跪必俟色怡而後起其天性有過人者加以遠遊閱歷益練達世務能洞悉情僞鄉黨姻族有疑難輒爲剖析過忿爭必委曲調停之人以是服公公雖勤儉起家而施濟無少吝嘗夜行委巷中聞號泣聲入偵之見一婦將投於井其夫曳持痛哭詢得其窘狀亟解囊代償之婦以得全其濟人利物多類此邑中應天河爲東鄉孔道歲久淤淺公倡議疏濬首捐數百金事得集鄉民至今賴之他若修橋賑貧捐衣施櫓汲汲若恐不及治家嚴整有法嘗著裕後格言錄於座右延師課後起家設三塾修饌必豐歲丙子予奉命典試江南旋視學江左公孫鷺門孝廉出予門下澧塘雲臺兩茂才又皆予同科所取士越二載己卯公季子午橋以杭協副將奉內諱歸里時相過從得悉其行誼今午橋尙余爲公傳因舉平日所聞以驗公仁心覃後之效固有信而可徵者矧午

橋精力正茂終制入朝天子方倚爲重鎮其所以發揚公澤者未有艾也公之諸孫登鄉薦列庠序者亦蒸蒸日起蔚爲國華公之栽植奚歉于古史所稱哉蓋繼太傅而起者又在公矣公諱衛南字利川縈波其號也以武生授州同知覃恩累贈武功將軍生雍正十年卒嘉慶十三年壽七十七配沙夫人自約暨豐莊敬一節累封夫人後公十二年卒壽九十子四朝桂朝樞程季卽午橋名杞

論曰自六行之敬不修於鄉而出私財以爲施濟者沾沾焉不免德色矣或者惑情福利務徇虛名濟不逮實與而傷惠於睦婣任恤之道猶無當也若公者積而能散趨義若渴豈以爲求名邀福地哉而冥漠之際應之靡爽知非勉強所能致已余傳公願有以風天下

江陰譜
節錄

誥授武功將軍廣東南韶連鎮總兵江陰午橋章公傳

徐松

余誥喜吳任臣十國春秋每讀章仔鈞及夫人練竊傳竊歎其活人食報宜子孫之蕃衍也仔鈞居浦城仕閩爲高州刺史檢校太傅宋贈瑯琊王諡忠憲練氏累封越國夫人爲章氏鼻祖八傳至宋宣教郎曰立之始徙家江陰又十八傳有隱君子曰達道精通周易有別解行世達道生文煥文煥生衛南早卒妻趙氏撫孤守節衛南有子四長朝桂次朝樞次程季曰杞字季高號午橋卽公也自幼入塾敏悟絕人稍

長倜儻不羣不屑屑於章句獨喜三畧七書及樓船陣法兼習騎射補武學生乾隆五十九年舉於鄉嘉慶四年成進士以待衛直乾清門守宿衛者七年夙夜匪懈退食輒以圖籍自娛十一年出爲浙江衢州鎮遊擊旋署太平鎮海參將制府方公維甸閱兵抵浙以公才守兼優委署杭州撫標參將二十一年遷平陽協副將未至調杭州二十四年以憂去道光二年起復授直隸三屯協副將三年六月擢廣東南韶連鎮總兵官先是公官杭協時制府董公教增保公堪勝鎮將之任仁廟諡公名中外望公以爲不久當大用旋以丁太夫人憂歸里及授三屯協值上恭謁西陵公總統行營事蒙召見垂詢久之未幾卽有是擢計公通籍時年未三十至是五十餘矣自泄衢州浙東西馬足幾遍所至之地簡軍實作士氣營伍肅然三屯所轄喜峰口爲宵小出沒所廣東南韶等處襟帶郴永亦素稱難治公恩威並濟姦宄屏息泄甯海時鄉民以爭地故將械鬪縣不能禁欲請兵捕治公曰此鄉愚當以理喻不可以兵激釀大事卽從數騎往諭以禍福相率散去卒擒其魁鞠遣之其在鎮海也私梟充斥公廉知係吏胥歛鹽賈錢故價昂爭爲私販公曰吾知所處矣非減價革弊不能銷官引與縣令某約禁吏胥毋得橫索有犯痛懲之一切苞苴陋習悉斥去旬日之內減價十五引鹽大暢私販歛跡鎮民便之公雖善撫下遇屬弁不職彈劾不稍

貸官杭協日察知某千總凌虐軍伍狀泄韶鎮一月悉守備某侵蝕糧餉咸論罷之遊擊李某貧不能之官分俸飲助千總某因公虧負逾限將奪職惜其才出己資代償其威惠並用多類此居家事親孝兄弟極友愛平日自奉甚儉然周恤宗黨營建祠宇則無纖毫吝色嘗欲置義田贍族謂士大夫家苟能充裕無有急於此者常以力不逮爲憾居恒喜吟咏工楷法著家誠若干條以示子弟以爲惻隱之心必須見諸實事方於物有濟又嘗書懷於韶州署壁曰銜命東南鎮一方摩挲士氣致鷹揚丹忱願比葵傾日敢說年來鬢髮蒼每言後生小子宜讀書知大義於官舍旁置塾課兵家子年五十四以病乞休未行卒軍民哭送相屬於道三世皆贈如公官子一烜候選同知孫五培垺璵璵皆以儒業世其家

論曰余讀章公行狀殆古所稱儒將哉其治軍也威而不猛其律已也清而不激其御衆也寬而有制其處家也儉而有禮公猶子詒燕與余同官中書後起蒸蒸大抵勤敏好學是固忠憲之澤未泯歟抑公世德作求有以振興而昌大之歟積善餘慶吾於紀章氏傳也益信

同上

敕授文林郎廣西興業縣知縣歸安又村公傳

文熊

公諱耀曾字崑甫號又村曾祖諱廷宏康熙壬午科副貢官仙居縣教諭累贈朝議

大夫祖諱瑚廩貢生海鹽縣訓導父諱寶訓廩膳生累贈奉政大夫公生而穎異及長工文章乾隆己亥年十九補邑庠生縣府院試皆第一是年秋遇恩科與從兄鸞同舉於鄉一時鉅公閱其文擊節稱之迨後九試禮闈六薦不售嘉慶辛酉大挑一等以知縣簽分廣西補用因親老告近改發江西署歷城吉水萍鄉定南石城鉛山等縣篆務所至有聲補上猶縣知縣上邑民俗強悍素號難治公蒞任首先修葺學宮繼又增廣書院學舍選高才生入院肄業士風爲之一振每逢朔望延學師親歷四鄉宣講聖諭廣訓化導愚氓就便問民疾苦意肫如也保甲爲戢盜良法地方官往往視爲具文公督率紳民認真編查閭閻靖謐並飭開闢曠地以重農桑設立義倉以備凶歲修濬水利以溉民田補葺城垣以資捍衛此外遷葬有禁糜費有禁少婦獨行村市又有禁凡所設施事事爲民生所利賴嗣丁母憂回籍守制服闋仍赴廣西候補署懷遠縣篆補興業縣知縣治事一如在上猶時調充道光壬午科鄉試同考官所取皆知名士旋解組歸其居家焉出平日所積廉俸增葺宗祠修培墳墓並捐置族人應試費以裨寒畯尤留心譜系暇輒考宗支徵文獻審定編次寒暑無間今譜例祠規諸條皆公當年所手定也鄉里有不平事爲力直之遇親族之貧者量力周濟其後進有可造之才務加修飾獎勵期底於成若年少子弟有不謹事必

嚴加斥責廟享墓祭有失儀者呵譴隨之故自公歸田一族之人罔不肅然從而興起焉此公不獨在官勤於其職而居家尤爲宗黨所矜式嗚呼如我公者勿可及已所著文集數種今僅存又村詩鈔探入續刻兩浙輜軒錄

誥授中憲大夫護淮揚海道淮安海防同知梅亭章公傳

張鱗

公諱承裴字猗園號梅亭姓章氏系出五季浦城太傅仔鈞公後累遷歸安之荻岡村家焉曾祖適成國學生考授州同知無子以猶子國學生茂春爲嗣生萃中乾隆癸卯順天舉人授福建大田知縣生子六公其四焉五歲就塾患痘瘍致疾閱六載而愈又六載應提學使試不中援例以從九品分發南河署河庫大使旋捐陞通判改發東河以防汎功歷署曹州曹考東昌上河兗州捕河各通判權河南開封下北同知題補衛輝衛糧通判陞山東運河同知護理運河兵備道丁父憂服闋仍赴東河長洲嚴公烺公之婿父也奉命督東河公於例應迴避改南河補淮安山安同知未幾嚴公移南河又赴東河先後署兗州運河河南上南同知丁母憂服除仍赴南河署徐州宿南通判補淮安海防同知護理淮海兵備道署裏河同知以疾卒公長於治河大吏倚如左右手方其任衛輝也萬錦灘河水暴漲里港亘起大沙水勢北射直齧衝工大灩深至六七丈自三段以至十八段歷七晝夜隨廂隨蟄而存工舊

料與民間陳稽蕩然無餘天忽大風勢甚岌岌危隄一縷僅存沿隄居民富者遷徙他所貧者扶老携幼環伺而哭在工諸人咸束手咨嗟無策公曰事亟矣奈何坐視吾民葬魚腹也遂率工役沂上流築挑水壩以殺來勢又赴下流購取青稽數十百畝並收買粗布無算以代繩蔴日夜與風力水力相搏持隄迄以完陽武封邱諸縣人民竟得無恙頌聲頓起閱月爲贈公六旬生辰紳耆咸至稱慶正酬酢間忽門外人聲鼎沸座客相顧駭愕莫知誰何門者來報則村民數百人舞蹈驢呼爲贈公壽也其民情愛戴如此及其之任城也河南滑縣山東曹縣匪類蠢動任城界曹邑警報迭聞大吏檄公舉辦團練公募卒數千人逐日操演屯紮要害自領一隊往來梭巡下令曰面有客氣者毋許留違如律間常督率僚屬按戶糾察或輕裝便服混僑伍間密查用是任城團練之名最著而匪類無敢入者人民得以安堵斯二事膾炙人口於此可以見公之治才矣他如挖沙濬河以濟運疏泉引渠以溉田料石程材以修隄有益於河防民生者難以枚舉任襄河同知時隄決九十餘丈大吏方倚公修築會有疾旋卒人咸惜之公配沈氏繼邵氏皆封恭人子三寬候補從九品乃新殤乃昌國學生前卒余與公弟超文爲鄉榜同年因悉公生平爰述其大畧以示後人

文林郎山東蒲台縣知縣會稽慎齋章公傳

賈楨

公姓章氏初名鳳翔字冠英號鏡蓉後以太和名登賢書服官時又改名炳然字慎齋系出後唐高州刺史檢校太傅仔鈞公渤海郡君練氏太君後父諱兩以家無恒產佐幕得薄修以供饋粥母周氏勤儉持家能安老萊之貧雖甑釜生塵處之宴如也公生而穎悟過目成誦鄉黨中有神童之譽性至孝每見母氏劬勞輒涕泣自奮曰必博得五花話以奉也母氏聞其言爲之動容十一歲應童子試嘉慶丙辰爲寶東皋學使所識拔補博士弟子員與馬海山輩受業於同邑王本滋孝廉學日益進詩文與王笠舫諸名士齊名年逾冠以屢躓棘闈家貧親老不得已爲負米計赴保陽探親不遇適有陶君爲清苑李椒坪明府記室係公夫人之舅氏因往投之然初未嘗謀面也一見相傾揄揚於李明府前李見公氣宇不凡時方判年官衙例設椒宴羣賢畢集李有意於試公也門酒聯吟爲金谷之令公對客揮毫立就七律數章咳唾皆成珠璣合座無不傾倒李益愛公之才卽委司筆札公於是遂爲入幕之賓陶之力也嗣遇校士之年擬寄籍清苑以就試會有所阻遂納監入北闈丙子科挑取臚錄充會典館臚錄叙績例得縣丞丁卯科復入秋闈中式舉人先是未入闈之前夢亡祖謂公曰今欲得售非易名不可次早見案上素紙隱隱有太和二字似淡

墨書成者遂更名填卷果獲售議叙以知縣候銓時先公督學畿輔素聞公名而李椒坪已洊升保陽太守以公之需次尚未及期也荐公任襄校之役先公雅重之公卽挽公授楨及弟樾二人讀循循善誘至今猶不忘師訓焉歲壬申公奉父諱旋里掌教上虞書院甲戌服闋入都謁選值己卯設科又進禮闈報罷後赴汴京視沈松坪外戚於祥符曹家寨時河決馬營壩口曹寨適當其衝居者大恐公具疏於金龍四大王祠得免水厄事詳公所著靈顯記及紀事詩中庚辰選授甘肅秦州禮縣知縣親老告近改選山東武定府蒲台縣知縣蒲台地連燕趙境多萑苻公下車之始卽立保甲之法諭以守望之義自捐廉俸千金以募兵壯立擒盜魁霍宗謙等十餘人置之法境內於是肅然公之銳於求治也方謂大展才猷據其蘊負乃以素性伉直不肯阿事大吏以致有意督過事相牽制遂鬱鬱不自得蒞官未及三年竟資志以沒嗚呼惜哉公篤於天性平居與諸弟共財而尤孝於事親母有危疾私割股療之而人莫之知也子三洵澍瀛均爲山左名幕孫三人亦皆嶄然見頭角矣今公之次子澍感懷手澤有汴游吟之刻特遣僕持書來請序於楨伏思公之詩不止此卷將來續集踵出傳誦於時必有能序之者非門人所敢贊一詞惟公之一生事蹟楨知之最稔爰披顛末而爲之傳庶讀公詩者因以知公之爲人云爾

誥授奉政大夫貴州廣順州知州江陰翼凡章公傳

丁寶楨

江陰章公諱詒燕字鷺門號翼凡以中翰出爲吾黔刺史寶楨於道光癸卯鄉闈忝出公門下三十年來海宇擾攘寶楨自詞館出守楚南旋奉調山東勦賊軍需旁午未遑通音問咸豐丁卯晤公同鄉詢知己山頽數年矣感慨久之同治辛未春公子型赴試禮闈道經山左囑爲公傳按狀公登嘉慶丙子科舉人七應會試挑取臚錄授內閣中書充文淵閣校理國史方畧館總校協辦侍讀道光辛丑推陞典籍選擇貴州廣順州知州其時公母陳太淑人在堂年屆八旬以道遠且有公兄在籍侍奉不願就養公遂抑情赴黔是年秋泄廣順其地苗漢雜居多命盜重獄公懲其黠者數人訟稍息城內舊有廣陽書院每逢月課公親爲評改厚給獎賞州試童子去取悉秉至公並因考棚頽廢爲捐廉銀四百兩興復之士林感頌又於鄉間擺鎖場創設義塾一所民知向學樸陋之風爲之一變旋調署安南縣士民於卸篆日整衣冠齋肴酒遠送山谷間其愛戴如此安南城在山坳中無河渠水道民間日用專恃井泉積雨又無所洩公爲浚雙井塘闢消水洞用是水旱無憂癸卯甲辰兩次分校鄉闈所取皆知名士而寶楨亦受知焉嗣以太淑人年高稟請開缺養親當時有以公秩未滿或勸稍留者公毅然上之時長沙賀藕耕制軍撫黔素重公允如所請公蒞

黔四載宦囊蕭然乙巳春南旋凡湘鄂潯陽諸名勝無不遊覽皆紀以詩有黔遊日記二卷旋里後太淑人康健猶昔逾兩載年臻九秩稱觴上壽孫曾林立采芹食餼者踵相接公板輿花下奉母閒居甚盛事也咸豐壬子太淑人壽終里第公與長兄盡哀盡禮大事甫畢粵匪東竄金陵鎮揚相繼失守邑令延辦團練公先議撫卹次招流亡任勞任怨如是者六七年城鄉安堵如故公有力焉大吏奏上奉旨加直隸州知州銜公因積勞於咸豐九年夏病歿距生乾隆五十六年享年六十有九覃恩誥授奉政大夫著有滄粟齋文稿詩集史漢諍言行世配高氏誥封宜人合葬邑之敵山中村新阡子四坊型塋塋坊廩貢生復設教諭型同治丁卯舉人揀選知縣堅翁生塋邑庠生孫十人鍾猷鍾祥鍾祚均廩生爾鈐增生鍾亮甲午舉人鍾祜己丑舉人鍾華鍾蘭均庠生鍾岱鍾衡業儒

賜進士出身誥授光祿大夫太子少保兵部尙書都察院右都御史四川總督受業門生平遠丁寶楨拜謚

誥授朝議大夫權甘肅按察使署蘭州屯田茶馬道歸安企山公傳畧

增繪

公諱桂文號企山世爲歸安人祖諱印春邑庠生父諱蒸附貢生候選國子監典籍

公幼負異稟長而益知力學納附貢七試秋闈不售以母老援例納粟入官非其志也道光庚子選授甘肅寧夏府通判以政最舉卓異升補涼州府莊浪同知再膺計典擢平涼府知府請假省親旋丁母憂服除起授蘭州府知府署蘭州屯田茶馬道權按察使篆務旋以制府樂彥亭事被累遣戍新疆同治壬戌抵烏魯木齊都統平公與語大奇之時新疆多故委總理文案逾年平公爲捐免遣戍旋又以勞勩入告得旨復原官而伊犁長將軍屢次函招相需甚殷公以既許平公辭不赴甲子陝西逆回竄擾甘肅新疆漢回事亦驟起公臨機應變多所裨益回逆勢極披猖陷漢城並及東西各州縣滿城危甚公飛書向昌吉令告急令得書星馳援救都統又檄公赴昌吉辦糧時城中方倚公爲重士民聞公將公出老幼男女數千人號泣遮擁馬首不得前黎明登車至日昃方出既出城越半月城遂陷公配劉恭人殉焉先是恭人寓蘭州聞變挈二子出關依公至是及於難二子以隨公出得免賊旋逼昌吉公命子分道走避冀延宗祀自率團勇出與賊接仗連戰皆捷直搗呼圖壁賊巢賊合東西兩路環圍數里相持半月援兵不至軍中糧且盡公知事不可爲乃仰天歎曰此我報國時也復督軍銜擊自辰至午力竭被數創而殞時同治三年九月二十日也得年五十有五公才具開敏通達治體歷任繁劇皆有能聲故由別駕屢舉卓異

涪膺監司其在官政績雖不克道其詳卽此爲國捐軀見危授命固偉然丈夫也古人有言死得其所可以無憾如公者非得其所耶公之宦甘肅也因太夫人年高不能奉板輿初留劉恭人在家侍養厥後遇報最入都必順道歸省慰倚閭望一日晨興忽心動蹶然曰吾母得無病乎遂上稟假歸至家母果疾革跪泣曰兒在此太夫人張目微視尋歿論者謂公遠道歸省乃獲送終盡人子禮蓋孝思所感云

誥授資政大夫河南糧鹽道廬江質夫章公傳

劉秉璋

公諱廷榜號質夫姓章氏宋大中大夫瓚由浦城遷廬州遂世爲廬江人父諱正濤候選州同知以公兄蘭台觀察官湖北鹽法武昌道贈資政大夫妣徐氏誥封夫人公少有至性及長重然諾好施予不求聞達平居惟以孝友任恤爲事觀察公以公資性明敏足以有爲爲由貢生捐部郎簽分刑部公聽斷明允理庶獄辦秋審克勤克慎多所平反爲大司寇某公所器有疑獄輒委公嗣奉旨隨扈赴圍處事敏捷邀特賞人爭榮之旋改官以道員歸部銓選聞蘭台觀察罷官太夫人鬱鬱不樂公乞假歸省推資政公在日好善遺意與蘭台觀察商置義田建家塾以厚宗族旋值歲饑凡設粥廠施棉衣暨捐藥餌棺木等事有裨賑務之舉靡不籌辦所謂親親而仁民者非耶在籍十年曲承色笑不忍離太夫人膝下觀察公以公年力强盛促之出

乃赴部候銓時適江淮間大水爲災公見飢民嗷嗷待食爲之惻然卽捐銀二萬兩以助工賑大府奏請優獎奉旨俞允旋授河南糧鹽道視事後清積弊革陋規稽倉儲整齟務次第飭行胥吏震懾人莫敢欺嗣因飛蝗蔽野公於盛暑率屬在朱仙鎮設法撲捕蝗竟以滅百姓歌頌載道未幾請迴避歸蓋其時太夫人春秋高陸行不便迎養而觀察公未喻其意責公年未艾不思建樹聲色俱厲公唯唯聽受觀察公嘗語人曰吾呵斥時吾子所不能受者吾弟能受之其克恭厥兄如此次年二月觀察公卽世公乃乞終養當觀察公病時公親侍湯藥衣不解帶者數日病革公悲慟交至凡附身附棺之物必誠必信星夜遣使召其姪瑄香給諫璧田太史歸遵命不使太夫人知公入侍慈幃強爲歡笑飲食起居益加謹奉是年九月太夫人亦卒公兩遭大故哀毀骨立營葬畢足跡不履城市而邑有義舉輒爲衆倡總理家政井井有條暇卽詣家塾觀生徒肄業或與二三父老登隴畝話桑麻爲樂未嘗以富貴自居人故樂與之近咸豐癸丑粵匪竄廬州公乃挈眷避臨安辛酉杭城陷公眷猶在內命各自爲謀其女引刃死一家星散公倉皇莫知所至有方巾道人導公出將之海甯前阻大河操舟者不肯渡道人招以手舟遂抵岸携公同登旣至宿破廟中告公曰明日東去可與家屬相聚轉瞬間道人失所在如言趨上海家屬果在相慶更

生同治癸亥吾廬恢復公携眷歸故里蕩然乃卜築蜃山之麓土階茆屋晏如也然公樂善不倦於新祠宇復義莊諸事猶能勉力任之並與邑人士按畝捐修文廟不足復竭力傾助明倫堂告成公之力也享年八十五無疾而卒夫人宋有淑德能逮下吾聞有陰德者必有厚福公優游林下四十餘年凡有義舉無不盡力屢邀恩獎由中憲晉封資政大夫子十五人曾孫以下百數計一門簪紱暉映淮南其福德流澤之長蓋自太傅公後一人而已某忝居世末夙相敬慕故述其崖畧而爲之傳

錄節

廬江瑄香給諫璧田太史合傳

金鑑

我族自宋遷廬至曾叔祖蘭臺公始大盛官階四品歷署兩司富貴勳名嘉道間爲淮南冠而弟兄競爽科第蟬聯司風憲掌文衡如二公者尤數百年來所未有吁盛矣哉公蘭臺公二子伯與仲皆嫡室何淑人出伯諱煒號瑄香仲諱瓊號璧田均由上舍捐部郎道光辛巳同登賢書己丑瑄香公成進士補刑部郎中旋掌河南道監察御史署吏科掌印給事中奉旨巡視南城京察一等陳奏皆中肯綮清結案牘七百餘件才大心細官聲赫然壬辰充順天鄉試同考官戊戌丁艱回籍不復出辛丑璧田公亦成進士留館授編修國史館協修充丁未會試同考官己酉浙江鄉試副考官所得皆當世知名士若大司寇龐公鍾璐侍御吳君鳳藻太史孫君念祖吳君

觀禮皆出其門文名藉甚庚戌亦乞假歸是二公者予皆師事之故能詳其事給諫公熱腸冷面嚴毅不可犯望之令人敬畏落落寡合惟與先伯樵雲公最相得家有小園一座四時花木悉備前爲廳事懸古今名人書畫左爲家塾延名師課讀其中書籍充牣旁有精舍三間爲公起居處焚香淪茗無事輒與先伯暢談史事上下千古胸中了了或與程君秩山劉君湘帆更相唱和持家嚴而有恩慷慨不吝事庶母以禮待兩弟以誠熙堂公弱冠貢成均公之教也予少時文字爲公所期許歲時伏臘塾師解館必招予館其家太史公平易近人才具短於兄而涵容過之聞爲部郎時給諫公操白簡將彈廣東某太守命出繕稿稿已具公愀然曰某年御史妄參吾父祖母驚悸寢食不安者累日設其家亦有老母將何如伯感悟立毀其稿仁人之言藹然動聽已酉大考列一等與滿州文君瑞受命典試浙闈比入闈文君抱病不起一切取決於公公細心校閱衡文不拘一格是科浙闈得人最盛復命後卽乞歸省墓與給諫公優游林下頗有終焉之志營別墅築花圃四圍皆平疇春夏之交禾黍競秀清風撲人眉宇以爲淵明栗里不是過也尤喜掖後進予與楊君禮南徐君小帆皆受業焉咸豐癸丑皖江不靖公在籍奉命與呂文靖公會辦團練毀家紓難指萬金輸廬郡助餉而人心不固望風驚潰公知事不可爲乃與給諫公挈眷南下

在浙適逢鄉試先期約省齋孫廉訪往謁大府曰國家時方用武需人孔亟皖南未經兵燹士子磨厲以待皖北俊秀避寇者多在蘇杭間請附浙闈試大府奏奉俞允是科廬州中式者數人公善書端楷爲當時第一所臨十三行視柳公權較勝時人得其寸楮珍爲墨寶賦崇先正無淮南輕佻氣習給諫公善詩著有六家詩選及涵翠山房雜咏因亂稿失零篇斷句至今猶膾炙人口文胎息國初俱得鮑覺生先生傳授心法而太史公時藝尤精使國家安享承平家塾重興二公以時誘掖其子若孫必有興者乃遭寇亂流離轉徙兄弟相繼客死他鄉哲人云亡不勝木壞山頽之感予故書其事爲太息久之夫以蘭台公之德澤宜及十世百世乃僅鍾於二公再傳而後一蹶幾不振豈極盛之下果難爲繼耶抑樵雲公盈虛消息之夢信有憑耶然天運循環無往不復安知其後無人繼起掇巍科登臚仕如二公之司風憲掌文衡爲宗族交游光寵哉予不敏負二公期望竊以二公之望我者望其後人云

來安章君傳

馮煦

廬江譜

君諱觀方字炳之滁之來安人九歲而孤力田以養母通方書尤嗜金石學於歐趙所錄存佚同異若指諸掌稍長來江寧與湯貞愍貽汾及侯青浦先生雲松遊識益進凡靈敦鍾貞之屬下至法書名畫一見洞真贗不豪髮爽貞愍尤禮異之初與兄

青上會語
食貧既君少少豐乃推田一成宅二區以奉之族有貧無以斂且葬者君助之卒事
癸丑之難君間歸來安又轉徙淮南北家毀矣而戚友之不自存者復罄所有濟之
蓋君嗜義若天性率而安之無豐約疏戚一也君自悼不學益督其子英讀更亂棊
貧而英所師必碩儒名德其束修必豐英卒補諸生有名而君前卒矣取於丁稱君
爲人叔子兆蘭與予習爰次所聞以傳之

論曰讀文至尺寸斗粟之謠以四海之富而不能贍其弟彼庸有所忮哉而任俠之
士揮千金於塗人猶敝屣然親而同氣則一絲一粒嘗徵色發聲以拒之豈有所忮
而靳而致然與亦以其不足爲名高也君長闌闔而所事於兄者如是可謂知本矣

高卷
類稿

誥授中憲大夫刑部直隸司主事浦城倬堂章公傳

勒方琦

余奉天子命巡撫入閩道經浦邑見吳山之聳翠南浦之西流黃華之起伏鬱積慨
然曰宜乎浦邑代有聞人不獨西山夫子爲有宋大儒也及自城而南度登雲里登
夕陽嶺蒼松翠竹遊目騁懷仰望諸山環峙一峯獨秀父老曰此所謂金婆尖也回
望吳山諸勝相去已二十餘里矣不數里爲臨江村因憶余丁酉拔貢同年倬堂章
君居浦之南此殆其里居也問之果然及至訪其居民則此地數百年來惟章君巍

然特出然後知山川靈淑之氣至君而一洩其奇於是造其廬求其後嗣皆能以詩書世其業今年冬其孫遠之來省晉謁間謂余與君交最久識君事最詳以其傳請余素知章氏爲浦城望族其先世若得象望之諸公皆宋時名臣與西山夫子後先輩出明初有章溢者自浦家處之龍泉爲太祖四先生之一浦之匡山其讀書處也至君高祖號毅菴樂善好施以孝義聞祖及父皆以忠厚傳家君始列官於朝與余同受知於卓秋帆相國同官刑曹者二十餘年咸豐甲寅君補直隸司主事至丁巳行遷員外矣竟於是年十月間卒迄今又二十餘年猶憶公餘退食相與質疑辨難飲酒賦詩猶前日事也君勞心案牘鉅細必親未嘗假權胥吏務存寬恕每事反覆推詳其難其慎秉性端嚴親戚僚友有相干以私者輒以今夕祇可談風月謝之不阿權貴後進爲司員者皆先後補外惟余與君株守待免不自知其拙也與人交始終如一至休戚相關有無相濟其餘事也戚誼之徒步來京者或教之讀書或集資就職必使之成名以去年未三十父朝議公卽棄世兩弟俱幼君撫之以恩勗之以義有推梨讓棗之風猶雅愛諸姪髫髻之句時見諸吟咏焉君弱冠以文章名試必高等領鄉薦者四次著有新溪文集三卷倬堂制藝八卷帖體詩二卷卒年六十嗟乎以君之才與學使涪登卿貳必能黼黻休明贊襄盛治卽出爲郡守爲監司亦必

興利除弊澤及一方而乃半生偃蹇終老刑曹可悲也夫雖然人患不能自立耳以君之秉性仁厚持躬清正卽未登仕版亦足以勵世摩鈍况乎績懋一官雖不敢謂與有宋諸公後先頡頏要亦仙霞以南塔嶺以北一時之傑矣何必以名位未彰爲

君惜

浦城

誥授中議大夫兼理江蘇淮揚海兵備道淮安府知府秋亭公傳

公諱儀林字秋亭姓章氏世爲會稽傅山人明初贈禮部侍郎適安公之裔也祖諱大錦山東壽張縣主簿父諱涵蘭儀主簿臺莊閘官因壽張公卒於官遂隸順天固安籍幼孤奇貧隨族人某游京師稍長爲曹吏入資得通判分發南河咸豐初河決豐工塞之已復決聖吏議時軍事起大吏留辦防堵軍儲六年復官署徐州通判外南同知以防剿功賞戴花翎遷同知改省安徽十一年援例改官江蘇仍治籌防事再遷知府補缺後以道員用加鹽運使銜同治三年署淮安府知府四年實授八年呈請開缺以道員候補居郡城光緒二年六月初七日卒年六十五方公至南河時河工已極敝而軍事方亟河督庚長識公於京師知其材行足賴至是厚任公凡金錢出入皆倚以主辦後稔知居官瘠苦將徙之脂膏地使人微諷之公不應而力請入都引見河督愕然曰章君豈少我邪行未幾皖寇陷清江自河督以下皆獲罪公

獨免同治元年盱眙吳勤惠公棠督漕河兼治軍旅延公爲之佐遇事侃侃持正議多不合然卒無以易益重之前後司餉需六七年雖大府徵調支發一錢一粟必究其根株嘗曰吾不以私於公者累公也吳公亦曰章君固廉吏且真愛我者也及知府事濬山陽市河涇河暨各支渠葺考柵書院百廢具舉不爲浮議所撓是時劇賊賴文洸寇山東沿海大擾請於漕督張公之萬界海流築長圍六塘河南岸爲守禦計圍亘百餘里奔走風雪中躬持籌算畫地賦工往來督察四旬圍成踰月賊酋潰敗南竄隄於圍爲東軍追擊及溺死者大半餘賊千餘人擁其酋夜半冒死突圍而奔中道散去至揚州遂成禽論者謂是役微長圍爲阻使賊全隊南馳其蹂躪不止一淮郡而建策興事實公一人之力也賊既平大吏詢以善後事與民間疾苦公以疏清河安東二邑水道及除清河攤派糧賦爲言既得請經營方有緒而公去任既而歎曰誰與吾民了此事乎乃屏常法獨身任其事貸官錢程工役稽戶籍勤劬鞅掌凡三年事皆告成而除賦之功爲鉅先是清河人慶壽寧兩鄉田自國初以來沒於水前令以其賦攤徵他鄉熟田中咸豐初河湖水涸沉田復出招墾課祖歲入萬餘緡而攤徵如故民屢請抵除當事者不之省至公始白其困銳意圖之百數十年積累一朝蠲除故民尤德之公爲人誠懇質直不欺其志嗜義如饑食渴飲意有所

赴不避嫌怨必要其成尤嚴於自守從宦三十年寸絲斗粟未嘗有所染殫心為民持身居官皆可為法有古循吏風天性孝友少嬰困躓長而自振迎嫡母與生母同居曲盡供養無間言厚愛昆弟同產九人析居時公方孺稚長乃復合撫諸昆弟子如其子居喪哀毀幾滅性自始歛至殯葬一依禮法三年不飲酒茹葷居於內人尤以為難自以少孤廢學燕坐輒手一編字句有疑必以問人嘗謂人曰吾生平無歉於志惟因少時衣食奔走不得廁名甲科以俗吏為當世所輕斯可恨耳若能成吾之志善讀書為好秀才於願足矣故每諄諄以積學砥行訓其子督課或逾夜分不輟云配朱淑人夙夜攻苦持家嚴整能成公之志賊入清河時官民奔散笈帑藏者輦金去或念公方入都家必乏以數百金致淑人不受則稱此章公寄我金今見歸淑人曰吾家不寄人金終不發緘卒還之時方顛沛而操持如此則公之為人可知已光緒七年淮人以公有遺愛於是邦即郡城書院為祠春秋祀之嗚呼桐鄉葬朱邑雒陽祠稚子公庶幾無愧焉

淮安府志清河縣志名宦傳參吳昆田墓表

誥授中憲大夫江南道監察御史歸安硯籽章公傳

孫詒經

君諱乃畚字念茲號硯籽姓章氏世為歸安人祖諱葵父諱家駿均以君貴贈中憲大夫祖母沈母沈均贈恭人君身不滿七尺豐頤廣額目閃閃有光舉止威重贈公

知其不凡教之甚嚴年十八充博士弟子贈公去世服闋咸豐乙卯與族弟紳同舉於鄉次年春闈報罷己未計偕北上無以治裝太恭人典簪珥始得成行又報罷君憤然曰吾不能成先人之志而慰慈母之心吾無以歸矣遂留京考取國子監學正庚申同族兄耀廷成進士用爲刑部主事惟時髮賊猖獗途爲之梗不獲假旋道聞烽火逼近鄉關君南望流涕旁皇無措既聞太恭人率眷屬俱脫於難乃喜遂於次年奉母僑寓京師由是悉意奉公居刑部幾二十年補貴州司主事陞廣西司員外郎福建司郎中以繁缺知府記名轉江南道監察御史兼理河南道事加三級當其在刑部也以勤能稱及爲御史不數月封章屢上如復社倉設社學汰冗員諸政皆彰彰者得旨飭行而湖州長興孝豐等縣自經兵亂土著之民少田畝荒蕪不治守令招徠外省人民墾種良莠不齊遂至喧賓奪主毆鬪頻興居民恒苦其擾轉相逃避胥吏亦因之徵多報少中飽浮收弊難枚舉爲湖州一大害事君廉得其情詳細疏陳奏上詔淵撫飭屬查明妥辦居民得以安堵此尤君嘉惠桑梓也已卯秋充順天武闈鄉試監試官時已得嗽疾慮貽太恭人憂強自掩飾勉力趨公次年正月乃不能支延至三月肌肉盡脫卒余與君同春秋榜知之甚詳雅愛其才謂天假之年使君得以敷歷中外其政績必有可觀乃屈於郎曹無由建樹至爲御史纔可設施

而以疾卒矣嗚呼惜哉

誥授中憲大夫光祿寺少卿歸安黼卿章公傳

鄭訓承

君姓章氏諱耀廷字擷芳號黼卿世居歸安縣之荻港村祖諱藝太學生父諱緯文東河蘭水考利巡檢荻溪章氏自君五世叔祖諱有大以父子先後官給諫而族始著厥後代有聞人嗣君與從弟乃畚接踵諫垣則又稱一時之盛焉君少有文名年十七游庠十八列高等食餼十九中道光丙午科副貢再試中己酉舉人初與會試取謄錄又試不中取教習第一庚申又試舉貢士以主事用簽分刑部補江西司主事遞陞安徽司員外郎四川司郎中授江西道監察御史旋調四川陞兵科掌印給事中轉鴻臚少卿陞光祿少卿充光緒癸未科會試同考官欽派大通橋抽查漕糧稽查北新倉事務年六十口卒君之在刑部也獄有夫與傭婦暱置妻於死而取傭婦者妻弟覺將訟之官賄以金事遂寢其妻弟頰索無厭竟誣以盜控諸部君廉得其實曰是忍人宜反坐方足蔽辜時又有旗人某嘗爲中書舍人納妾某氏而以妾弟爲門者妾生二子舍人死家事一歸舍人之弟虐待其姪門者屢規之不聽且禁其飲食門者憤甚懷刃以刺傷其肱舍人之弟以奴殺主告君曰汝非主也於律奴謀殺家長期親已行者斬願若年七十得減議情又可原將奈何彼死無可貸願不

忍其斷頭耳上官以君不能舉厥職也以二獄付他人治之竟以盜殺主論斬君曰吾誠不才然於方寸安矣旋補御史時以考教習弊甚多言官交章論列君曰是不難苛繩奚爲宜令於傳到書數十字將其取中卷校對之則遣替與否字跡顯然奏上詔如議行君平日學求克己而於諸大僚之卓卓者尤嚴責備謂官常之飭自長吏始其所上封章有可傳者迨躋卿貳恪循厥職於朝廷政務能持大體不爲矯激之行余與君爲同年友先後同爲諫官知君甚詳今於其歿述吾所知書之於右君之後人庶得所觀覽焉

文林郎候選訓導咸寧蘭室章公傳

余聯沅

公諱列侯號蘭室姓章氏系出唐太傅仔鈞公之後仔鈞公第十五子仁輔公會孫寄生由浦城遷楚州寄生曾孫肇文歷瀟湘雲夢之間又徙鄂州咸寧遂世爲咸邑谷口人祖諱涵谷上庠生屢赴棘闈六膺房薦不售以詩畫琴書自娛父諱蘊山郡增生授徒里中教法嚴密後啟多所成就鄉邦推重公幼秉庭訓舉動如成人及長詩賦文詞迥出塵表年二十三以古學考取邑弟子員旋補增廣生肄業鄂垣江漢書院爾時英銳之氣視科第如拾芥然屢困鄉闈道光己酉間館鄧陽潘氏家沉受業焉同學諸子俱掇芹香去咸豐壬子公文戰失利時粵逆竄鄂是歲臘月遂踞省

垣土匪乘機肆掠公與衆集鄉勇自衛地方略靖癸丑正月賊擾下游甲寅復上犯湘鄂咸邑爲出入要道遭害尤甚鄉民被擄者多公奮不顧身與鄉人謀齊團保衛之策咸曰子書生也地方獲全固善萬一不濟如一鄉性命何公曰從賊死不從賊未必遂死不從賊而事成則一鄉受其利設或不諧我當以身任之况匹夫不可奪志祇要衆志成城自然勇氣百倍但須避賊之鋒計出萬全庶可殺賊則義憤伸鄉黨固而團練可成矣於是集團練勇公多方激勵賊至竭力抵禦一鄉倚爲保障賊衆呼爲章鐵頭以其不畏鋒刃焉僞賊首某銜恨次骨懸格捕之有能獲公者受重賞戚黨皆爲膽碎公不爲動相持數年前後殺賊以千計附近數百里間雖婦人孺子無不知有章鐵頭咸豐六年鄂撫胡文忠公以公集團殺賊有功桑梓奏保以訓導不論雙單月選用虎頭湖者武屬咽喉也湖面遼闊爲江咸嘉蒲四邑儲水之區自粵賊肆擾本地匪類多嘯聚其中行旅患之東南數縣費運不通公協同縣尉督率巡勇先後搜捕殲其首惡商旅遂得暢行是年夏武屬大旱赤地千里時賊尙踞鄂大憲堵截糧運粒米不許入金口公請於中丞採辦湘米以資接濟民賴以無饑里有陳姓者嘗被隣匪滋擾族衆往興國捕捉反誣以賊縛送州官幾遭不測公力白其誣羣始免於難有友某曾陷賊中事靖後游勇藉隙索詐家幾不保公格殺之

餘衆竄逸一家獲安其勇於任事類如此公平時雖以團務膺心而謳吟不輟如鄂城謠省垣克復誌喜貞德長春引諸什直以激勵人心扶持世教爲己任非特爲一鄉除賊安良而已自口口後羣賊爲官軍次第削平紳民重睹太平公於同治甲子科中本省鄉試舉人議者咸謂公保護鄉里之報乙丑試禮部後不中主講光化復文書院士林宗仰一時名公卿如雷侍郎藿郊魏軍門玉成無不爭相結納晚年於宅之西南隅築一園顏其額曰一壺天上有清芬樓公憇於是栽花種竹畫松詠詩以養天幾年口口卒著有憇園存稿公天性篤厚平日待人以恕而遇事沉毅勇敢一往不可抑止使出其幹濟爲國宣猷豈特爲一方造福而已乃晚年僅博一第竟擁臯皮以終論者惜之沉向辱公知今聞其薨爰摭生平大概而爲之傳以示來禩

誥贈朝議大夫湖南桃源縣知縣福建莆田縣涵江巡檢會稽春生章公傳

李文田

公姓章諱震字春生會稽人也系出五代時太傅仔鈞公後太傅配練夫人有保全建州功世稱全城章氏有宋一代人物鼎盛會稽稱山其一支也公先世有隱德多名儒家素封竭力好善不與人較錙銖家中落公祖鶴亭公居鄉有忠厚長者名里有閩趨質望廬輒返公父心和公豁達大度居家教子孫有禮法而尤疏於財喜贍

族人族人以公之疏財也愈爭求之公無不應家益落心和公生兩子公其季也公幼甚孝六七歲遇父母疾輒立左右不飲食及母馬孺人父心和公相繼卒公哀毀瘠立歲時祭祀必泣終其身五十年如一日公讀書慧甚能通大義去常解以家累不能卒讀改習律遊幕福建依其舅氏馬公於律例覃思精考深明律外之意治獄有聲時咸豐辛酉壬戌間髮逆竄閩福鼎公隨曾公觀察往援閩解移防建甯公軍中籌畫深中肯綮曾公器之以軍功保巡檢卽授興化府莆田縣涵江巡檢公以長才居末秩知者屈之公喟然歎曰巡檢豈不可爲哉涵江去縣治五十里地衝事繁公夙興夜寐治事甚勤屏僕役巡行村堡訓百姓耕讀煦煦然如父老之於子弟莆邑多械鬪擄殺涵江四村尤悍自公親往勸諭多有一言立解散者公天性廉介不喜錢官涵江十五六年庖無肉門無僕室無金珠涵江本優缺公一切漏規胥裁革遂成瘠缺民間有章公不取一草之謠邑令朱公廉吏也喜公廉且以公素精律學委審縣獄終朱公任凡五年公拔幽隱務平恕結案千餘起撫軍丁公日昌精吏治恒偵察所部聞公治事曰閩中第一好官也將特擢會丁公去位公亦不汲汲於榮進曰窮達命也官無大小但問心可對百姓而已涵江有海口故事以巡檢司稽查每船有費卽漁舟出入港汊亦有規錢公悉裁之不許丁役滋擾船舶商民感泣

公在涵久爲民所信有硝磺差過境勢甚張遇民輒毆棄官物於道而以盜劫飛訴上憲禍將不測公聞變亟出與委解官爭之力趣就道事遂寢保全甚多稅局訪偷漏株連五十餘家繫執繫繫公力白上憲僅懲其一二餘悉釋之富人某負人多金病暴亡子幼稚衆爭取攘幾覆巢公馳詣其家爲之覈券清理毋許欺孤寡多取贏並爲懲其強暴其家感甚以巨金夜謝公笑卻之巨賈黃姓爲人誣控私鑄事急上憲逮治公言其冤獄得解公未嘗自矜絕不受餽遺邑令鮑性嚴酷有人以事忤執置站籠氣垂絕公亟與爭言同是朝廷赤子不可草菅人命力保釋後其人來謝勿與見曰私恩不可市也離涵轄四十里有大江曰西湖端明陡門水漏溢百里內農田失收公憂之奉縣檄越境勸民募築四閱月而隄成除數十年大患時秋暑甚烈公冒暑督工七十餘晝夜汗流至踵遂中暑而病綿延兩年坐是不起光緒壬午春公以病告歸去涵之日士民泣下立石誌德有私祀者有數耆民送至浙方還公友于甚篤事兄純夫如父公生於道光癸巳八月十五日未時卒於光緒壬午七月十一日卯時配倪能以清廉相夫公爲廉吏孺人力也公疾孺人割股乞代亦賢矣哉公生子一女二

論曰公以高才甘短馭不獲大用惜哉然心存利濟惠澤及民宜其有後也哲嗣觀

光余已丑典試浙江門下士也爲越中名士奇氣天挺能文章以國史館纂脩截取
行將仕矣勵乃清節毋負先人

觀光後改名錫光緒壬辰進士湖
南桃源縣知縣照加銜贈如其官

誥授振威將軍記名提督江蘇淮揚鎮總兵湘鄉作堂章公傳 楊昌濬

公諱合才譜名俊義字作堂湘鄉人宋丞相郇國公得象之後世居邑之四都黃田
村少時躬稼養親落落負奇氣咸豐三年粵逆洪秀全倡亂擾湖南時王壯武公以
諸生奉命率鄉兵討賊公仗劍從之復東安郴桂尋出境討平湖北崇通蒲山及江
西吉安臨江建昌撫州等城九年收景德鎮十年回勦楚疆餘匪嘗被賊鎗刺右臂
貫肋尚手刃數賊飲口如常善舞大刀躍馬陷陣賊見之無不辟易上游奇其才命
總湘軍營務東下督攻皖之徽甯旋解徽圍累級擢總兵賜花翎得獎振勇巴圖魯
名號同治初髮逆寇皖蔓延數十郡縣牽制我軍無從爲規復白下之舉公與劉忠
壯公誓死殺賊燔克各城堅守涇縣以孤軍當悍賊數萬晝夜登陴目不交睫有間
卽出擊城賴以完皖南平我軍乃得以全力進逼金陵歲其事上嘉之晉公提督特
給封典五年曾文正公討捻淮上檄公領左軍同勦嗣因西捻亂劇隨左文襄公西
援喋血上蔡西華間蹙擒陝北匪重創旣而捻首張總愚由陝竄晉謀窺燕京公與
忠壯跟蹤追勦嘗一晝夜馳二百餘里從間道繞賊先截擊保定城外撲退羣賊張

逆溺死餘賊亦旋滅是役也擒賊以十餘萬騎蜂擁奔掠公與忠壯兵不滿萬電掣
驄馳保全畿輔功實爲楚淮各軍冠文襄以公最爲驍勇出色奏保奉旨補江蘇蘇
松鎮總兵賞穿黃馬褂換法福凌阿巴圖魯名號七年引兵合勦陝回忠壯拔綏德
州城進軍甘肅公時護糧稍後會右軍兵變幾被戕躍馬出謀諸忠壯以計定之糧
亦鮮失八年克靈州賞頭品頂戴九年進討甘回馬化澁屢破賊壘是冬攻馬五寨
忠壯中飛礮落馬公憤甚麾軍士火其寨冒身鎗彈中越牆先登諸軍競進賊焚斃
無算擒馬五斬之隨與忠壯兄子襄勤公謀破金積堡益力金積堡爲馬逆化澁老
巢尤險峻不可拔公策長圍困之分路鏟平楊明馬家河灘各堡折其犄角之勢馬
逆懼繳械降襄勤許以不死公以元兇稽誅曷懲後力爭之逆重賂公公愈怒天未
明卽手誅之並殲其黨衆大快自是關隴之賊十除八九矣方忠壯之薨也餉匱軍
幾渙公協諸將震厲三軍不數月功果就厥後襄勤滌盪河湟掃平塞外僉謂軍威
自此役振焉功上穆宗大悅賜白玉翎管搬指玉柄小刀大小荷包以褒之初湘軍
新喪大帥推公總領其衆公堅以礮傷右足折脛辭尋丁母喪歸里曾文正檄令墨
經招選精銳編爲老湘合字七營帶赴金陵防堵旣夕訓練嘗戒諸將曰天下事未
可知不可一日忘戰至今號爲勁軍顧公性嚴能與士卒同甘苦連年督修沿江礮

臺及疏濬沙州圩十二圩京口內河諸役賞罰必明人雖勞無有怨者光緒二年補江西九江鎮總兵留防如故八年調江蘇淮揚鎮總兵仍領原營兼統清淮水陸馬步全軍充江南武鄉試會考官九年法蘭西踞越南西貢閩粵告警時曾惠敏公奉使歐洲密疏於朝言越南待援甚急援越之軍惟淮揚鎮章某宜文襄方倚重公特疏留之已而彭剛直公調催赴粵公分合字三營委偏將往備寇澳門十年夏法艦窺滬自率四營守吳淞九月中法和議成仍回任清江爲南北通衢伏莽孔多公申徹巡防萑苻歛迹齊魯間舊有白蓮教遺黨王古佛謀不軌公聞屏諸將率健勇數名密緝獲之黨遂散公爲人忱勤樸寡言笑尤耿介不媚權貴希寵榮有索賕者公嚴拒之卒無如公何文正謂公與忠壯相伯仲沈文肅公奏稱軍令森嚴民懷兵畏其言呐呐不出諸口有古名將風蓋皆知公深重器公賢也十七年十二月以病薨於鎮署吳督劉公臚公事實疏請卹典上震悼賜祭給治喪銀兩廕一子給予六品頂戴生平戰績宣付史館立傳並於原籍及立功省分建立專祠越二年特諭地方官春秋致祭

贊曰公之治兵嚴明如程不識得士卒如李廣夙聞之矣予攝漕督時接公談益敬且慕及校其部曲恍乎遇敵不可撼也又聞公部所至無秋毫擾王壯武之遺法庶

幾永焉邇年外人雄視海上司兵政者豔稱德意志陸操新法必胥天下之兵而習之然非得公之忠義固結雖有良法其能收一戰之效耶

光緒二十一年
湘鄉黃田譜

誥授中憲大夫貴州黎平府古州同知會稽芳軒章公傳

譚廷獻

古州府君名桂慶字仲芬號芳軒會稽章氏世載名德從祀鄉賢南洲先生十二世孫曾祖烝祖均厥考悅祖仲子也幼貌溫文入塾嗜書輒成誦嗜讀至元日猶溫燻不廢孝友夙具居喪毀瘠事伯兄如父遭亂流徙山野不去側草衣坐叢冢間縱論文字爲樂事平補諸生益究有用書同治六年舉於鄉考取內閣中書儔直勤求學行日著顯禮部入試不上第截取府同知分貴州時吳縣潘大夫霽爲撫部知君才望召治幕府文書從閱軍伍屏賂遺同官推敬戊子秋入闈爲同考官呈薦多才雋古州者諸葛征蠻故壘在焉險惡阻聲教康熙闢土遂爲通衢重鎮殷繁難治君開敏善斷事至立剖時創設抽釐所司苛斂衆商方闕將忱之以兵君曰如是則速禍肩輿從一人入衆中愷惻喻利害遂解散營卒魚肉苗砦移無名屍冒詐之君一再誦驗得其誣由是羣苗翕然章公爲政奉令惟謹矣荒徼失學閔之修學舍課以功令文字開誘經訓秀良于于來相慕悅三年後州人劉志高領鄉薦咸頌府君文治固百年所未見調署麻哈州政簡而公勤無改官古州五年爲設州以來循良稱首

顧心竭觸瘴疾病遂卒於官方欲謀祀田贍族黨不副其志歸葬之日商民奔走哭聲盈城野苗衆金環花衣夾道涕泗焚香伏送者相望不絕嗚呼仕學君子殆無愧古人矣卒年五十九子維周候選九品倬漢光緒十五年己丑舉人湖南候補知縣譚廷獻曰與君同丁卯鄉舉一再相見未傾襟抱君好雅詠有詩存四卷蓀隣詞一卷都下聯吟集二卷亦未得過讀也治行焯然邊徼歌頌獻平生之言百里之有司簡書奔走毋自菲薄如其旦夕行意之政不崇朝澤被其境有不待請命束縛於上官者顧十年行不克踐如章府君非行意者與敢以告有志之令長若夫章氏家學不隲廢家乘與國史表裏獻服膺君家實齋先生之言也尤信

復堂存稿

誥授武功將軍副將銜長江水師湖北簪洲營叅將署漢陽營游擊蔭庭公傳君諱文彬號蔭庭姓章氏世爲湖南某縣人祖諱某父諱某君其次子也七齡就外傳讀書能通大義及長君父以家內食指繁命棄書習賈爲分肩計咸豐初赴鄂豫販米時髮匪擾亂皖鄂各省所在騷然君忠勇奮發歲乙卯請於父母投効湖北水師右營庚申調入健捷營充當哨弁駐紮蘄水縣巴河蘭溪一帶嗣以克復孝感京山雲夢等縣並剿平捻股案內由外委遞保都司並賞戴花翎同治戊辰江督曾文正公奏設長江水師君改隸長江由裕溪營把總陞至荊州營都司垂十六年光緒

癸未法越構兵彭剛直公奉命督辦廣東防務檄調君赴粵委帶親兵營次年法人就欵海防凱撤仍回長江丙戌夏調署田鎮營都司因前次調防粵東經粵督彙案保奏奉旨以游擊留原標補用並加副將銜丁亥升補巴河營游擊辛卯調署漢陽營游擊甲午鄂省辦理江防修田家鎮礮臺楚督張文襄公以君任田鎮久熟悉彼處形勢委帶鐵字後營赴田鎮督修礮臺到防不數日適倭氛告警奉電旨調鐵軍北上遂卸漢陽游篆同熊統領拔隊出關防堵時值隆冬冰雪載道君衝寒前進風餐露宿與士卒共甘苦到防督軍竭力操練不少休息而咳嗽哮喘之疾自此伏矣乙未秋防務解嚴稟請回鄂養痾旋奉飭知陞補箴洲營叅將文襄以君熟悉水師飭回漢陽調任兼帶襄河水師前營冬間奉密劄飭赴上游查哨痰喘適作力疾往返在途又感風寒誤服猛劑復患咯血遂以不起君天性孝友事二親能得其歡心待僚屬馭弁兵一以威信爲主自隸長江隨彭剛直公赴上下游巡閱十有餘年其間調和將士整飭營規實與有力剛直深器之使假以天年專闡節鉞在指顧間乃竟積勞以歿爲可惜也君生平慷慨好施與人以急難告者解囊不吝故居官三十年卒之日尙有虧累云妾賈氏平日賦性幽嫻君故後竟以身殉有足稱者子二恭讓恭廉

誥授奉直大夫前湖北嘉魚縣知縣會稽碩卿章君傳

繆荃孫後珊

章君壽康原名貞字碩卿浙江會稽人父雅瀛官四川布政司照磨鄧井關縣丞爲佐貳中最優之缺席豐履厚人皆羨之是時蜀中游宦子弟類皆鮮衣怒馬絲竹盧雉吟朋狎客三五成羣號爲豪舉君爲單衣窘步躑躅會府街後宰門書肆中或購或閱與余數數遇以爲寒士也咨詢門閥則大驚與談版本源流貫串如流水則又大異余引君爲同志君亦以余爲知己十日必三四晤余時以君稱說於朋儕前衆皆目笑以余以書餽君而冀君之助也余亦不與衆辨辛未應川東道姚彥侍記室之招彥侍出錢獻之新斟注漢書地理志徐星伯手寫各家考證於其書眉以爲佳本君請刻之而歲畢歸原書於姚氏是爲君刻書之始乙亥余爲張文襄公撰書目畚問時引君爲助文襄知之亦禮君爲座上客向之笑君者又無不奇君君終落寞如故川中書賈日集於門雲南湖北販書來者無不投君各如其意而去所收乃大富又復廣搗金石鑿別書畫與錢徐山錢鐵江宣麓公沈吟樵諸君交意氣益發舒矣丁丑君援例以知州銜知縣分發湖北入都引見余供職詞垣同寓永興寺君挾巨資廣收書籍至揚蘇書賈聞風而來捆百箱出都到鄂丁父艱仍旋蜀所刻亦漸富乙酉再回鄂中補嘉魚縣知縣到任未久適欽差查辦湖南事件入城君未遠接

大怒過鄂言之裕制軍遂以玩視民瘼日以刻書爲事降一級調用矣君以三月到任舉債辦奏銷十月交卸未及收漕遂大困舉所儲書賤價售之以完公虧已而投文襄公於廣東漸罄所藏先金文後碑版最後盡出藏書刻板悉數售之往來湖北江甯卒鬱鬱不得志而治生之術亦少差光緒丙午罹外證歿於湖北年止五十有七並無子息文襄聞其卒也助之六白金藉以殮葬悲哉君豪於酒食量兼人素習歐書中年忽喜摹宋本今存其手鈔敬鄉錄友林乙集小畜外集數種每一展玩如對故人而音容不得見矣畧叙舊事藉以傳君並列所刻書於後

書目見文獻錄
藝風堂集漫存

誥贈通議大夫山東候補知縣湯溪章漁汀先生傳

繼 良紹庭

先生姓章氏諱慶雲漁汀其別號也系出全城太傅公其先世有諱昱者南宋初官蘭谿知州有德政子因家焉居蘭之太平鄉今隸湯邑余自丁亥迄癸卯守是邦十餘稔耳其名久矣亟以培植人才擴充書院創孝廉堂按月命課於湯得孝廉章生萼銜爲人端謹知爲先生三子也余甚器之益諗其家世代有積德先生事親以孝聞初補弟子員輒之省肄業博覽群書善古文工詩賦闡試屢薦戊午竟以額滿見遺先生歎曰母老矣奚能遠離耶爰侍慈幃潛心理學持躬制行得楓山之風縱以歲貢老其材而手不停披身任教育者歷數十年無惰容每謂弟子曰讀書最喫

緊關頭須從忠恕二字入手人能盡己推己便能爲人能爲人然後能爲官毋徒學文爲前程計也其言若是洵足爲士林模楷得先儒之真授受晚年尤耽花卉一木一石摩挲弗釋過其門蘭蕙芬芳馥郁襲人余性嗜蘭屢欲訪而未果歲戊戌章生得大挑用知縣分山左親老告近改江蘇是歲生弟萼鈞亦膺貢兩姪藻揚藻揮先後遊庠且補增悉是先生庭訓父子祖孫一門衿袖人多榮之而先生自視欲然恆以父母不及見爲憾厥後章生備員齊魯遇覃恩誥贈通議大夫上及曾祖父母先生雖歿其亦可少慰歟歲庚戌章生來謁丐余爲傳爰撮叙大畧書以歸之

贊曰金華章氏世有賢哲明時楓山尤稱魁碩今於先生雖云晚出貞亮挺姿醴粹秉質博綜典核頤情著述講授勲拳置身理窟馬帳宏開鯉庭侍側子貴孫賢桂芬蘭茁家學淵源一時莫匹先生之風洵堪矜式

宣統二年

誥授振威將軍故任四川重慶鎮總兵合肥鼎丞章公傳

缺名

清甲申中法之役外交雖甚失敗至割安南畀法然軍事上除用張佩綸爲大帥燿海軍於馬江外其餘陸戰皆勝績可言尤以皖中二名將之功爲最二名將者一爲王孝祺君以北海鎮兵大奏鎮南關諒山之捷王君之功在馮子材上張南皮嘗親口道之見予所作淮軍三名將傳曾於去年登諸民立報一卽章高元君大勝法兵

於基隆使台灣危而復安此皆近代戰史中卓有聲譽之戰也章君諱高元字鼎丞原籍安徽和州移居合肥先世多爲壽春鎮標武弁章君年未弱冠以報父兄之仇自募一軍張白徽幟屢戰屢捷聲威突振爲清故相李鴻章所倚賴甲申中法之役君從劉銘傳渡台灣適基隆守將巽懦要塞爲法兵襲據君聞之則投戈躍起袒臂一呼得死士數百乘夜往攻法兵臨發號於衆曰吾必滅此敵而後朝也卽率所部死士蹈入敵壘短兵肉薄鋒厲無前法兵當者死傷山積餘衆梟水逃遁法艦見不可乘亦卽引去君竟以是克復基隆要塞至今基隆赫然有京觀在前年本埠某西報嘗記法國議院籌欸若干萬佛郎託日本台灣總督代修斯墓修繕既竟並遣法員往台舉行戰死者二十五年大祭卽君當年所殺之敵殆不下數千也當是時君之威名震中外然君處之殊撝謙不欲言功以重守將失陷要塞之罪蓋清是時法猶嚴失陷要塞死無幸故也君能自抑其功續他人命故軍士益感激樂爲君效死其後清廷聞君守台功最終頒奇車博巴圖魯勇號彰君奇績此役台灣遂以君之勇畧得全旋任掛印澎湖總兵銳意欲闢番界箠路藍縷頗奏膚功後調登萊青總鎮值甲午中東戰起前軍屢敗自朝鮮牙山平壤浸浸退守奉境敵兵且大入君於甲午冬間奉命渡遼扼守蓋平與日本乃木希典卽世所稱乃木大將所率之一師團全軍相

遇君所將爲偏師少於乃木所部五六倍以能得士心交綏之頃頗獲勝利乃木窺君所將無多陰用包圍之法陷君圍中君與所部環起應敵曾無退志大戰五六日夜不得少休臥雪不寒撫創不痛咸奮力致死欲摧強敵及至彈罄糧竭復以短兵相接所部十死七八九始突圍而出是時宋慶擁重兵爲主帥忌君能戰坐視不救故君底於敗平日厚養之精銳盡於此役矣是役也雖敗猶榮日本叅謀本部所編之日清戰史盛稱君之勇敢蓋中日之役堪稱戰者惟此而已君有舊部胡某者憤宋慶不顧大局貽禍國家方重圍衝出卽欲刺宋除害君力誡而止之謂臨敵而自傷主將其如國家何也胡由是憤懣成疾頸上現一贅瘤大如石瓠亦終身相依不忍去每酒酣耳熱爲人述蓋平戰事聞者未嘗不歎息沾襟也嗣後調鎮登萊駐守膠州適丁酉秋兗州土匪戕德國一教士德使方向總理各國事務衙門索債遽於冬間有德艦三艘徑趨膠州海面游弋一日晨與君方在操場簡練德兵忽登岸其主將先賚文來畧言此事已在總署交涉與貴軍無干請相約兩軍皆不侵犯君以職守所在不之許顧其時火藥彈子悉罄蓋李秉衡時爲魯撫專以苛尅爲政凡秋季應領火藥子彈必遲至冬盡始發無論冬季已君以所部勤於操演故子藥早空且兗案及德圖膠之謀皆早發露而事前京省皆未有文牘通知其疏忽至此故君

當時直覺德兵之突如其來藐不知其用意所在乃急通電詢問且請發藥彈備戰而電線已爲德兵割斷不得已遣卒走百里外分電北洋山東請命北洋大臣王文韶覆電力禁開戰清慈禧太后知君猛將恐君因職守遽戰也更由北洋徑下特旨調君離開膠州百里從此膠州遂爲德所租借矣君一腔熱血屢請一戰卒末由達振躍叱咤無可發舒兩耳由是遂永失聰矣預知清廷前途無幸浩然有歸志矣其後雖嘗統自強軍且爲李鴻章調赴北洋皆不久卽去又起爲重慶鎮總兵時岑春煊督蜀方事勦匪川東一路倚君爲長城絕無亂萌未幾終告歸歸之日行抵漢口資斧卽竭貸於旅舍然後成行蓋君生平絕不愛錢所得官俸皆以餒養戰士所施不可億計有餘則捐諸地方修治河渠道路所至皆如此故治軍四五十年在他人善自營者往往擁資百萬而君竟一錢莫名此其廉潔寡慾之性尤有古名將風矣嗣是息影金陵蟄居一室不與外物接觸去年避地滬濱賃居新闢路仁濟里一千七百號房舍屢致斷炊近月邁肝疾常覺腹痛終至不起臨危之日有勸以少進阿片冀可自寧者力呵止之曰吾生七十一年未嘗吸此詎可臨死敗操素乎其自治力之崇深又如此以本月十二日子時卒有子二人能繼父志將以十九日扶柩回籍卜葬云

見民國元年十一月二十八號即陰曆十月二十日當是十月初四日也

誥授通奉大夫花翎在任候選道署四川西昌縣事射洪縣知縣會稽勤生章

君傳

缺名

章君諱儀慶以避宣統帝御名改名慶字勤生一字寄齋系出閩之浦城縣五代太傅仔鈞公後至宋光寧間有諱彥武者始遷於越遂世爲會稽道墟里人八世祖廠明永樂甲申進士次子瑾正統丙辰進士父子均官禮部侍郎爲會邑望族君隨宦入蜀弱齡失怙家無擔石儲賴其叔某寄資接濟得肆力於學未嘗以窮阨餒其志弱冠遵母夫人教專心讀律幕游養母垂二十年擅法學尤長政治歷佐州邑主者一皆課最故蜀中上自當道下逮微員未吏靡不知有章君聲譽洋溢一時爭羅致之館威愍公鳳全幕府六年志同道合尤稱卓絕以功得叙縣丞光緒二十八年會川省紅燈教匪事起時君適參資州王公明德幕運籌決勝事賴以平王公詳請大府奏保得晉知縣補缺後以直隸州知州用並賞戴花翎加同知銜二十九年劍川趙公藩權川臬徵君入幕事無鉅細悉以決之三十年金壇馮撫軍煦秉臬來川君時將赴引束裝戒途矣特挽留贊助數月君歷舉興革事宜以應次第施行十月轉餉入都引見次年回川卽奉委辦川路公司文案旋調學務處時蜀學規興君建白多所發明川督錫公雅重君特辟爲幕僚仍令兼辦學務君夙夜在公不以爲

勞九月委署劍州知州承積疲之餘百端闡委州又川北通衢教育不興文化否塞君下車首捐廉俸勦辦蠶桑籌集閒款廣立學校洩劍一年百廢俱興而民不擾聽訟則片言以決兩造折服民謬頌之三十二年七月調署蒲江縣未赴值南部教匪何如道潛謀不軌糾衆煽亂意圖由川北舉事先竄匿縣屬廣平場與昭昆連一帶君事前偵悉督團立馳掩捕搜獲冊籍證據舉火焚之匪以謀破遂分頭畢集悉衆抵拒君聯合昭團併力奮擊陣擒首要各犯餘衆概行解散川北亂機遂定事平錫公專章入告特旨晉知府銜軍功隨帶加三級錫公以南部爲匪根株地令由劍移權南部君抵任卽大張示諭搜捕餘孽不株累一人設施一如治劍期滿仍留署任三十三年正月調署冕寧縣彼處地屬邊要漢夷雜居教時復相訐宰是邑者非畏難引疾卽獲咎去官鮮有及瓜而代者大府以非君莫屬故調是邑君三月抵任清結夷教各案多起復招募土勇勤加訓練夷人有梗化或擾亂者卽督練馳往痛懲之其帖然馴服者則懷柔欵洽固不周至民教案件但論是非持平剖判民心感服並於城鄉遍立學堂籌資增設教養工廠積習頓革縣以大治在任三年冕人士建設生祠供奉之宣統二年奏補射洪縣知縣三年二月調署西昌縣知縣地爲甯遠附郭首邑俗與冕甯同爲政則倍難於冕君之移此以太守陳公廷緒屢次稟調

故也君敷政一如治冕時以報効賑捐鉅款特旨晉道員在任候選加三品銜縣有保正張耀堂者豪霸一方歷任各官每事姑容致積惡愈甚君受事未久其黨倚勢殺人獲案訊服問擬如律耀堂藉公晉見乞予輕辦君斥之使去卽出條革退卒抵其黨於法張自知捻惡連夜遁匿滇境君亦不復深求未幾而路事發生亂機響應君以寧屬內地靜謐惟嚴防大渡河一路以杜外匪竄擾稟請鎮府派撥軍隊聯合防營暨鄰封兵團悉力扼守鎮府所部勁旅坐是調撥在外城中僅留守衛隊與新集之民軍耳會有縣屬黃連坡裁缺土千總王玉庫以被裁觖望夙懷野心其子蓋耀堂之婿父子同惡共濟與耀堂狼狽爲奸玉庫調知城內兵單陰遣其子迎耀堂歸謬託革命嘯聚黨徒於九月初四日倉卒起事卽在黃連坡劫殺游歷西人護勇四名同時被戕德昌巡檢冉君瑞德馳縣告變中途被害耀堂及玉庫父子糾黨僞爲捆送夷匪乘夜賺入南門縣去南門近距鎮府各署數里匪衆奄至洶湧直進劫毀監獄連斃丁役多人時天未大明君聞變出堂大聲理喻玉庫之子首先揮刀刺君腰部君大罵不絕羣刃齊集身受數十創而殞匪取其首領以去時宣統三年九月初五日卯時也距生同治元年五月十八日酉時享年五十歲君堂姪候選縣丞鏞見君之出左右擁護同時死之君配顏氏讀書知大義冒死直出一見驚痛遽暈

仆君側匪刺之數四以爲已死遂紛掠縣庫財物以去東方旣白鎮府始聞警分督衛隊攻擊匪衆奔逸出城奪獲首領分別棺殮如禮靈櫬並寄城內昭忠祠張黃率領餘匪退紮對河廬山據爲巢穴鎮府乃大集民軍百計環攻直抵匪穴擒縛張耀堂黃玉庫父子跪列柩前生割其頭滴血致祭萬目瞻矚翕然快之君隨任僅夫人與幼女二長子憲供差成都次子灝留學北京君被害之日夫人創甚遲久乃蘇每欲身殉因念靈櫬未歸弱女爲累不得已茹苦含辛冀得送櫬以歸縣屬禮州有胡氏者素好義迎夫人母女同其眷屬以居并移兩櫬暫寄禮州某寺次年南路稍靖於是鎮府派撥兵練送眷柩回省云君天性孝友待友以誠爲人倜儻有奇氣平時篤嗜金石書畫凡鼎彝尊罍秦漢碑碣宋元真蹟搜羅繁富畢萃一室顏其額曰古歡齋故君於篆刻書畫無一不精藉是陶冶性情不以稍累其志於書無所不讀文字力追漢唐詩誦逼近韓杜人獲其片紙尺幅以爲至珍君長子憲四川補用府經歷次子灝度支部主事能世其家女四尙幼

皇朝通志卷之...

章氏會譜德慶四編卷之四

會稽章貽賢輯撰

墓誌

敕贈徵仕郎禮科給事中崇祀鄉賢故明副貢遂安果菴章公墓誌銘

王昭度

予與章范山年兄乙丑同殿試壬申同謁選丁丑同行取後同官臺省晨夕追隨今承乏撫兩浙適章年兄來晤出年伯行述命爲墓誌情意肫切予何敢辭公諱復亨字乾生號果菴明孝廉舒城公令嗣少從父宦流寇圍城悉心捍禦保障金湯公實多贊畫焉事舒城公偕陳孺人備盡孝道天資英敏博極羣書爲文古奧離奇黎左巖先生歲科俱冠軍兩中副車李文宗拔置恩選會鼎革終隱不仕閉門教子足跡不入城市待宗族親友和平寬厚閱兩朝人無間言所著詩古文詞風行海內郡邑七舉鄉飲正賓通邑合詞公舉崇祀鄉賢癸未覃恩勅贈禮科給事中元配毛氏勅贈孺人秉性淳淑敬事姑嫜相夫創業課子成名遠邇翕然贊頌觀公與孺人之碩德徽音雖古所稱梁孟何多讓焉公生於明萬歷庚戌三月十二日辰時終於康熙丙寅年八月十三日丑時孺人生於萬歷己酉年二月初二日丑時終於康熙辛亥

年三月十一日丑時生子四人繼娶王孺人生於崇禎丙子年十二月二十三日子時終於康熙壬辰年十一月初九日申時公長子振蓀廩貢生娶毛氏俱歿次振藻邑庠生娶姜氏旌表節孝歿乏嗣三振萼康熙乙丑進士禮科給事中娶余氏四振孳郡庠生娶毛氏方氏女二長適侍講方猶次適郡廩毛郁芳孫八人令嗣君卜吉徐家園安葬雙親耐王孺人并長君夫婦于側地近先塋祖孫父子團欒九原諒爲快意予公務倥傯深媿不文聊備述梗槩以應范兄之命銘曰

全城世胄積笏名家嵩生俊傑川毓英華乾元善長坤德柔嘉龍章三錫象服六珈繩繩孫子桂茁蘭芽

康熙五十一年遂安泚水譜嚴州志列文苑

誥贈朝議大夫工部主事歸安霞桴章公墓誌銘

胡天游

西漢之處士貴於三公則嚴遵鄭樸至今傳焉東都之獨行譽美千載則王忱趙咨其名顯焉流風無替軌躅聿新蟠林潛壑有韜寶之君子矣章公諱嘉猷字遐孚湖州歸安人也語其得姓則殷王之子食采斯彰論其受世則全城之功貽慶方大曾王祖考代承隱德比於潯陽翟氏湯莊繼稱逸民荊州習隆門戶累標儒業何多讓焉公幼而孤露孝友素成長益束修行誼嘉備藏經緯於不試樂優游以順時李仲元化行鄉閭汜穉春施及州里古所罕者今乎見之方康熙初東南猶用兵湖多羣

盜日剽井聚虜人親戚去之山中重責贖賂公先人在焉乃走伏林莽俟盜盡醉亟負其父宵行四十里得脫歸卽馳往杭州號訴上官言盜殘暴狀上官爲檄湖官吏治之由是遠近得安蓋公之力也湖人好博尤喜訟往往至傾家公憫其俗一日爲酒會召諸少年博者皆在起奉酒與約曰願自今勿復博少年咸感私相誓如公戒終身延及旁縣蒲飲之風幾熄矣人有忿訐必求質是非得公片言並釋然服故終公世里無訟者昔王烈以公方服下而里俗歸仁郭泰以盛德薰衆而凶慝改行霍原所處涿郡敬爲神明許劭在焉本初變其車服以公方之得毋似乎有朱穆之崇厚而德色不形有戴高之慷慨而然諾非狹常以暇日扁舟出游見人行汲衣不覆體公悉以所服解贈之竟擁被而返有以賈販來湖者折閱流落不能自歸爲資給使還若是不一湖人業蠶值蠶月桑貴鄉人或以子質錢市桑公與之錢而還其子湖常大饑多流殍有司議爲粥以賑公曰以粥不如給粟之便且得也具條法施之數萬衆賴以全活邑令聞而善焉使縣中給粟悉知其規事遂以濟會疫癘繼作村舍幾墟公乃伐木置棺廣爲殮葬又於冬月爲衣襦布被予鄰里貧寡多至百餘託朱季而婚喪者何啻百人待晏嬰而火食者豈惟三族若夫南陽樊重起築陂塘西蜀糜元通闢道路則公爲鄉人治圩田疏漲潦變其瘠确盡作膏腴召還流亡各安

生業魚池可種家饒范蠡之經桑柘成林利濟齊民之術廣平阡陌理正崎嶇躬出
二千餘金開塗二十餘里功勤五載行歌坦道於心不矜其惠甚博且麟士認履知
雅量之深孝緒焚車見長者之厚常於他所營莊舍有卞氏者邱隴趾接墓風地脈
意恐相妨公知之卽日輟去好行其德慕義無窮似此猶多未可徧述是以行成布
衣之雄名樹鄉國之遠父老於蘇則號之爲大人州將於邴原式閭而致敬前湖州
太守章公紹聖下車臨郡首問書賢尤所禮重以其同姓遂兄事公訪之郡政資其
宏畧屬當鄉酒衆謀先生太守曰非公無足爲國人矜式遂升賓席而繫歌篚爵時
以爲光行年六十與其二季友愛彌篤三姜時聞於共被四皓懽然於一門匕箸取
徹未析乎薛包田宅相讓不煩乎許武安人李氏具孝敬仁恕之德與公合志齊範
有二子長曰孟哲次曰廷宏公稟姿特異少也負奇應鳳讀書而五行俱下禰衡談
藝而一覽輒通袁彥道本擅其雄豪王武子獨標其俊爽視青紫如俯拾指功名與
夙期當明季世兵戈雲倣公之先人顧見如此使輟仕進還求治生遂用子貢貨殖
之才致猗頓封君之業旣而鄭公業有其富樂仲長統道在田園卒以博濟之心宏
利物之美逍遙物外徜徉人間斯亦足追龐公於鹿門振逸民之遐調者矣公生崇
禎丁丑歲卒康熙辛卯歲壽七十有五安人年如公後公七年卒合葬於其縣之草

田村公沒而遺澤在人遠近相弔望舊居者或動歎歔過新阡者爭培松柏然而積厚流慶已見於當時作善降祥方徵於繼世公孫曾文學甲第如霞日始會鸞鶴漸舉而詔書追封清秋光晉工部主事者則諸孫今山東道御史有大之所馳也射洪陳隱居既詳家錄於正字汲縣趙貞固宜升頌碣於昭夷吉石是礪乃爲銘曰

在秦名將在宋名相世表宏聲代承華望閩海既遷吳興始壯抱璞闕彩先潛後亢靈和蓄蘊偉人是生外含玉潤中吐金明本爲儒傑翻遺宦情藏用不試藻德獨榮采真而游爲善最樂於家於邦孔惠孔博風反澆漓里化敦朴賢型何遠古人可作生民渾渾逝者滔滔華屋忽謝馬鬣方高同封玉鏡長掩金刀惟流連於舊德共悵望於元郊

簡石山房集

誥授中憲大夫分巡江西南贛道兼按察使副使會稽人也章公墓誌銘

儲大文

越州山水清勝古號爲競秀爭流而磊攀瑰琦之士鍾毓滋衍蓋絲朱育會稽記虞預會稽典錄謝承會稽先賢傳暨賀氏先賢傳像讚鍾離岫會稽後賢傳其著錄滋詳而趙楊皇甫氏之吳越春秋削繁傳記暨吳越國寶大以後諸編不與焉國家淳化覃敷英彥奮起東南之美固匪直竹箭而會稽道墟章氏才備滋繁若予所聞江

西提刑按察使司分巡贛南道副使人也章公此其爲磊舉瑰琦之士而雅宜詳書於朱虞謝賀鍾離之編者乎公名履成字慧臣人也其號姓苑系太公之裔封於障遂氏焉五代閩時太傅公仔鈞刺建州二將後期當斬夫人練氏請釋之公卒二將從南唐軍破建寧斬織城時夫人留城中遺之旗植門以免夫人返其旗曰將軍知報德當看此一城民不爾吾不忍獨生二將從之迄今號全城太傅子十有五人多秩宰執侍從而家浦城者尤顯九傳而至學士公綜甲科第一仕至戶部員外郎陝西轉運使龍圖閣學士始徙越之山陰蘭亭街又七傳至添十九公彥武復徙會稽王港來孫損庵公元至正間避吳國江南行省徵泊明太祖繇寧越過其地歎曰此有道之墟也迄今聚族贏萬邑里胥號道墟章氏公五世祖美中嘉靖辛丑進士工部都水司郎中權蕪湖關稅先期額贏罷權者而四月曾祖光祖知江甯縣有惠政祖明達堙銓注同知州事顯考程以厚德聞邑里贈中憲大夫雲南沅江知府復贈奉直大夫戶部陝西清吏司郎中妣某氏封太恭人公少有巨人志中憲公暨太恭人深器之性慷慨名動公卿間其仕也蓋絲康熙庚申後銓注知四川雅州榮經縣外艱闋復知河南開封府太康縣尋擢知山東濟南府泰安州覃恩封奉直大夫晉級一擢知江南徽州府內艱闋復知雲南大理府調沅江晉封中憲大夫復晉級一

擢直隸通永道副使尋改大名道胥不逮莅職戊戌改江西贛南道蓋勳秩籍於吏部南曹者且寢四十年而遽以雪冤獄罷公之始莅榮經也當吳逆初燔楚胥荆榛公听夕撫凋瘵不少輟而滇黔遺孽尙馘伏朝命勇畧將軍趙公良棟奮威將軍王公進寶分道進討奮威將軍繇建昌入北距雅州百里有奇勇畧將軍繇威甯入取道雅州時將軍久駐陝之徽縣期宅部兵會發亟檄雅州備軍食而經歲不至州牧狃於前牒不少待積一日倏到滿漢兵六萬至督糧使暨州牧胥贓避中丞杭公亦恩遽甚廉公才亟檄攝州篆許以從宜將軍雅與中丞隙又詗知蜀廩匱蘄用乏軍興坐之乃大張戈纛甲士羅庭馳箭檄公詣帳詰其實公對曰謹如檄將軍怒曰若見吾敕書乎文官三品以下得軍法從事若不畏死耶勒促草軍食狀公立書呈之將軍視左右而嘻內蘄威懾公會斬犯令兩卒輒昇公持出和門以徇公如令入覆色不少變將軍復顧左右咋舌曰文吏中迺得此人內奇之而稔知雅州廩尤匱遽令牙將持糧牒萬紙至期一晝夜集州署嫺黨胥環泣公麾去亟帥州錄事夜貸於鄉度訖不克卒給而川南道侍王將軍糧差可淹一二日迺疾馳百里外義乞之搢鎖廓門畢運載諸筏順流下至期而集州民驢呼將軍大喜曰君信克依佐吾辦賊師隨發命隨營南行百里坐帳下而勞之食泊歸則奮威將軍糧亦胥集杭公暨承

宣劉公頓首謝特疏舉任建昌道雖格於部議而公絲此才詣懋著寢達中朝矣太和殿肇工購材於蜀公以幹材遴偕朝使往度密籌巉壁不少憚憚顧金園業難符格而驅萬牛且莫克達泣請於中丞中丞奏免獲允時議令四川度地徵賦公從容言蜀民新脫兵燹瘡痍未起宜少紓其力令若急腴之以賦恐所傷滋多議獲寢蓋公蒞蜀凡七年其知泰安也州當南北之衝盜多以藥薰商旅顛而取其貨公排根痛治之迺息州爲旗人逋逃藪事發多株連公許自首以寬窩主鄰右罪逃人迺絕故事州民漕運米東平水次津費溢於正賦車輓勸甚公改官運著爲令審丁痛革賣富差貧弊里書束手丁丑戊寅州薦饑公白中丞請賑不許迺倣齊黔赦法爲食於路以待饑者益發米千石以濟新泰長清萊蕪蒙陰諸鄰封就食氓全活者數十萬御史陽城張公泰交使過其地而嘉之遂以災荒入告朝廷遣官散賑中丞大恚草疏誣劾公甫就而中丞慥罷民胥以手加額稱快事蓋公蒞泰安且越十年其知徽州也甫三月而事胥理至其知大理簡節疏目疆以戎索歲饑米石錢四千發粟減值全活者數萬知沅江地南錯交阯多讐殺公曲諭之廢些蒙蒲俗寢革除民塘兵役關道減直售米鹽金銀銅鑛攝糧儲道驛鹽道篆事胥理蓋公蒞滇再任凡十有三年而勳秩日晉尤克以靜鎮物中朝胥以制撫鈞樞蘄之洎其移贛南道也故

事循明軍門控制蠻越例不親民事公歎曰衡署分巡之謂何時民有冤獄衆環聚而譟於門公力申雪而守吏懼臯逮已深文致之公竟罷而獄迄不克直公家狀曰甯棄官以全民毋充位以誣民有味哉其言之也此所謂磊犖瑰琦士而雅宜詳書於會稽典錄傳記之諸編者乎公性孝友太蒸人色少不愉輒長跪榻前達旦內外艱毀甚仲弟文鑽光祿鴻臚寺少卿嘗病公泣禱漸減年以益弟叔弟文銓注通府先卒撫弟子如子遇族黨雅有恩意環道墟數十里邨聚胥擬唐章全益氏此亦宜並書公配唐氏繼邵氏胥封恭人又娶祝氏封宜人胥有婦德子二伯廷珪邵出知山西平陽府事仲廷璿祝出前福建汀漳道署汀州府事胥克纘武以彌展公雅志女二茂才龔祖嘉文學陳昉其僭也胥唐出孫七長應煌六館生次應燧應煒應燮應煥應耀胥以才著孫女四曾孫一正梧而平陽汀漳二公暨孫娶若聘女暨孫女適若字胥冠蓋甲族也公卒於雍正甲辰夏六月九日距生順治乙酉年八十某月窆於某縣某之阡予謹按章氏繇秦陳後至太傅公而望彌華顯宋三平章副樞參政之勳階衡援暨學士公之高科望之表民之遠學雄詞侍御之峻節明中丞大理少宗伯大宗伯之勳閱清標孟山仲山大力幾山之文藝册帙不勝書至繇建安徙越則都水公暨都諫公清德尤焯著而公用儁才偉畧武之世望彌以克振昔宋浦

城陽文公祖妣實出駕部章氏嘗賦疊律贈平章文簡公宰歸化曰于公陰德知終大萬石家風喜不衰又曰執手勉君勤素業歸來更直鳳凰池今平陽汀漳公當益繼平章樞密武而文簡公繇學士陟東府侍御望埒永嘉崇安明大宗伯文懿公尤以醇儒稱此胥公文孫所憲法請以楊文公律爲石匱鑑水之寶符可也予謹誌公墓並爲之銘其詞曰

維原每每維川訂訂維贛南公允文允武言儀威鳳言馴贊虎以藩以宣無斃無射言藏窀穸於茲吉土子孫宜之克昌克譽爰銘庸勳式昭終古以炳苗山秀靈之府

清朝
類徵

敕授脩職郎雲和縣訓導會稽懿園章公墓誌銘

陶正靖

越有大君子懿園先生者能文章修司徒六行不貪戀博士以去去之後又六年而卒孝子琦遣使走京師來乞銘其言曰章氏上世爲閩人五代之際太傅公諱仔鈞仕王審知爲高州刺史檢校太傅公歿而越國夫人練氏以義全建州一城垂澤閩中五傳而繼質夫公子諱綜者累官龍圖閣學士徙越州山陰又六傳我十九府君諱彥武遷會稽僦山麓家焉今爲會稽僦山人也五世祖南洲公諱穎郡庠生研精理學爲隆慶間大儒崇祀鄉賢歷高曾祖世族昭著而仕不顯至於先君一爲

博士官以卒例無狀無諡議得有幽堂之銘以表見於後世而昭示其子孫敢以爲請始余在楚與琦有縉紵之交既而與其昆弟遊後琦客吳門都下偕余往還最久熟先生行誼不敢辭先生諱立德字亦升懿園其號自少穎悟不羣年二十補郡博士弟子員丁父艱服除食餼又丁母艱視宅兆獨身入叢篁中道遇虎勿怖爲人狀貌魁偉舉止嚴重有威儀人望而畏之與之居久而可親考其行義卓如也康熙十三年盜賊蜂起里中無賴子爭爲亂以應先生奉父母僑郡城父病卒榻拊絞衾必誠必信越人忌客棺勸先生毋扶柩入門先生號而泣曰父死之謂何而計休咎家故饒暇胸交集門垣跬步外動輒攘辭搆難訛言朋興一日中相驚以數四先生以隻身搯柱內則極哀盡禮外則散財禦侮迄以無患人稱其仁智配王孺人賢明早卒不再娶獨操家政錢穀征稅外歲時伏臘問遺親知故舊雖惇嫠老孤馬鑿洗削之類罔不周至里中有大疑難爭訟咸質直先生村東北二里許濱海斗門曰黃草瀝自明嘉靖間太守湯公紹恩建閘於西北三江口而瀝久閉謀利者潛啟之值秋潮橫海風盪激聲震三四里羣相顧詫愕先生聞報卽率先捍禦操畚鍤晝夜督築於黃沙白露間完舊增新田廬無恙其於大事無瞻顧若此直老屋之南修竹一叢闢其地爲聽竹軒匡狀締几縱橫書史時與客觥籌笑語促數紉逝不稍假而卒飲

衍衍不及於亂酒間或議論文源流及古今成敗得失四座莫不心折經學之失傳久矣言易者無隋經籍志六十九部唐四庫書目八十八部卽宋東萊經傳十二卷未經省識至以朱子之本義從程傳之分增亂孔子之舊而朱子釋彖傳象傳數語遂茫然無安頓南洲公著易解八卷駁正訛謬其書留河南新鄉郭氏先生有子就豫撫幕屬百計求之不可得歎戲累歎曰某惟寐忘此其文下筆纏纏千餘言潔靜精微深有得於易自二十歲至五十考輒高等顧屢困棘闈既而臥病扁門絕進取一意教其子若孫以道義文章子若孫咸克自樹得口於成常詔其外孫劉大申來學曰汝不記戴山先生乎實余高祖南洲公以養以教俾成大儒迄於今登科舊額尙懸余祖堂余不及吾祖而戴山先生則汝劉氏所奉爲宗袞也汝勉之戴山先生者南洲公之外孫也余攷先生喪父時年二十有二喪母時年二十有九卽其喪妻也年止三十有九非誠有過人之議與定靜安慮之學則夫利害動於中而聲色亂于外烏能以鎮于倉卒歷數十年而不變哉先生以敦本勵行嗣其先以不娶報其妻以學守教其子若孫及外孫他若鈞稽出入於財利絲毫不爽遇歛捐賑能任負大事人推以巨人長德得其一已足名當時而傳後世而先生兼而有之不可謂大君子矣乎先生既不得志於有司年亦且七十餘矣以明經爲處州雲和學訓導

至卽脩葺巽宮振興文教士子欣奉爲圭臬閱六月引疾歸歸之日做願道通追壽其父母百歲設奠陳詞觀者嘆息以此知先生尤終身孺慕也其卒也以雍正十二年四月初三日年八十生平不絕方外交而惡佛事遺命母以是汙我一如其教會祖爲漢萬歷壬午舉人河南永寧縣知縣改廣西北流縣祀名宦祖曰鳳竹邑庠生考曰正國待贈登侍郎配王孺人待贈登侍郎王用錫女卒於康熙三十二年十二月二十五日年四十有二男四人長士候選州同知次琦歲貢生候選儒學訓導次鐘拔貢生候選儒學教諭次鏞國學生女三人長適歲貢生候選儒學訓導劉正誼次適甲辰舉人揀選知縣陶熒竝王孺人出次適王繼焯妾安氏出土鐘鏞俱先先生卒孫男八人克昌國學生芳渚芳沚芳洲芳湄芳濬邑庠生俱士出芳渚嗣鐘後芳湄嗣鏞後芳春邑庠生芳澐俱琦出曾孫男十八人如柏如桂如楠如梧如桐如械如棟如模如概如棠如榿如槐如林如楷如樽如杓如樛如杜曾孫女八人始王孺人葬於芝山議者謂地未善今將以乾隆元年四月初九日偕儒人合葬天柱峰之官山嶼系以銘曰

是爲大君子蔚然有儀劬躬靈後而蓄不施歸於其所婦則偶依於其夫婦則右卜云其吉藏斯永久

何山智九公分祠支譜

誥贈朝議大夫工部主事仙居縣教諭歸安裴山章公墓誌銘 任蘭枝

封工部主事故仙居縣教諭裴山章公與沈宜人既合葬於歸安之月葭莊其子有大爲余門下士抱狀來謁請所以銘諸壤以耀其幽而示乎後者余思公令德著聞浙西行事列於郡書今礪石已具誌銘余何敢辭公諱廷宏字玉虹裴山其號云世爲儒家幼卽傑出始就試有司僅十齡成文甚駛爲邑令所奇既列諸生連被諸鉅公甄識名大起康熙壬午遂副貢士舉於鄉公之父爲大學生素倜儻勇於爲義耿精忠等亂東南時所在盜賊流熾大學君召子弟賦糧授兵以捍其鄉往往跳身矢石間里賴以安鄉人益加敬信然奸猾亦潛忌之噉其多貲則交相傾陷嘗械大學君以去公出金贖之放還復爲所陷不得脫公乃挺身與訟冒暑雪嘗辛苦勤勞數載事竟大直而家亦遂貧適浙西饑疫大學君予餓者廩死者殮尙如平時然力已不供公隱質田宅以辦一如父意又不使稍聞至事母安人尤謹安人耄喪明好潔逾甚非公所進輒不食而沈安人佐之凡安人所一臥起一膳飲及織屨事必親事焉人謂公昔爲父求直赴官府對簿意志甚壯今奉安人顧油油如嬰兒嗚呼其亦可知公之爲人也公旣以貢士有名於時其交游益衆自沈安人來歸而友朋之贈貽燕飲愈以有助安人性端莊歸公二十餘年而喜笑之聲不達戶外以是常爲翁

姑所重始時鄰里婦媪或相謂爾汝及有大貴乃更尊稱之安人曰若奈何以兒貴
遞異昔爲乎公生平坦厚而治家肅然遇人以誠不知世有所爲機巧者其慷慨樂
善調惠不吝殆天性然營先祠置祀田以鳩宗族卹貧糴助死喪排患釋難歸安之
人至今爭道之然君雖爲儒者後稍學治生其於權輕重計贏絀顧又至精少工爲
文思慰大學君益奮志求雋乃坐困場屋時時賦詩以抒悲懷乃貢士九次雍正庚
戌得選教諭而有大有於是年成進士公亦就老無意於仕矣有大旣由外令入爲都
水曹以乾隆丙辰登極恩沈安人俱得封其卒也乾隆丁巳公卒二年而沈安人繼
之而沈安人又以丁巳升耐恩晉封宜人公亦加贈奉直大夫公二子長有大次瑚
方爲諸生而有大有子寶傳爲公孫者壬戌進士猶未仕嗚呼公行修於家德施於鄉
洵無愧古君子哉乃爲之銘曰

幽宮合嘉芳協利千年瞻馬鬣衆所思名不滅留清風映茗雪

歸安荻溪譜

誥贈資政大夫湖北鹽法武昌道鄉飲大賓盧江履和章公墓誌銘

吳芳培

先生姓章諱可鍾字履和以孫廷樑貴累贈資政大夫係出唐太傅忠憲公後自宋
大中大夫瓚公由閩遷廬世爲士族高祖諱顯明庠生曾祖諱明儒明庠生祖諱世

輔隱居教授爲時所稱考諱成玠績學不售以曾孫廷樑貴贈資政大夫妣氏何贈夫人先生行修高潔少以純孝稱伯兄鐸早卒遺男二女一俱幼先生視之如己出爲營嫁娶延師課其二子皆成立而先生試屢屈遂棄舉業督家政意不屑屑於貲財以故家漸嗇然遇姻故有急必以周雖屢空宴如也某氏子里中豪也擁重貲好施予又挾魁梧奇偉跣弛不可羈勒之才意氣傾倒一時時人多從之遊然以不得交先生爲恨常自抑損造請願得一顧至再三先生卒辭勿與通其人慚而退所與交獨獻南李君邑柴薛君數人而已薛君隱君子李君名顯而行益篤學者所稱月溪先生是也方母何夫人歿將葬於其先之西塋術者以爲不吉且曰吾爲君卜得善地葬且獲顯福但不利於某家先生愀然曰吾圖先魄安耳何福之足云况如公言是禍人以自福也吾不忍也本葬於已所卜處至今其子孫竟繁盛逾曩時先生不苟言笑與人言無不懇欵入情然於是非曲直纖毫無所假性好靜足不出門戶偶出過市擁市門坐者無少長見輒起屏息拱立俟先生過數武度弗顧然後敢復坐猶祇肅不自安也戚里有違言先生輒隨時救正以故其鎮所居不下數十戶終先生之身無齟齬事乾隆乙未舉鄉飲禮當事以先生應無不悅服者將卒具衣冠集族衆子孫囑曰吾生平無他善狀獨區區之心在於忠厚今且死願汝曹志之不

忘吾目瞑矣遂卒鄉人聞之咸感泣先生生於康熙丙戌年九月初七日卒於乾隆丙申年十二月十三日配徐氏累贈夫人子二長正波太學生贈中憲大夫次正濤候選州同知累贈資政大夫女一適名族孫八楫庠生棟候選武畧佐騎尉杰庠生植例贈朝議大夫柯候選布政司理問樑湖北鹽法武昌道樞例贈朝議大夫榜候補道曾孫十有六炳耀均太學生煒瓊俱道光辛巳科舉人候選郎中焜候補知府灼爛煥太學生燦庠生煥瑤候補鹽運司運同雲錦候選布政司經歷平候選布政司理問焯燿琅元孫六邦裕候選府通判莖城華壩塹以嘉慶二十四年十一月十九日遷葬於北鄉之韓家橋子正波孫杰耐遠以狀來乞銘培於先生分屬姻婭誼不得辭謹按狀而爲之誌復繫以銘銘曰

治峰秀峙篤生我公世積其德至公益隆匪身之榮而後以啓俾熾而昌施於孫子乃卜其吉厚壤高原君子之宅萬世之安無敢毀傷剪其條肆伐石陳詞以告來世

廬江譜

國子監生歸安醇菴章公墓誌銘

朱珪

歸安章子萃聞其本生祖醇菴府君之訃哀甚泣而請于珪曰吾祖行敦德于躬施惠於族黨潛曜咎爽耄耄不倦非公曷闡于不朽予習知章子之誠篤非阿其親者

案狀府君諱遙翰字尊懷號醇菴其先自會稽遷歸之荻岡村家焉父諱絃勳有子五人府君之兄曰靜園仲韶弟曰呂涯碧軒父善病府君侍起居最謹年十八喪父以家計支絀遠賈於閩粵暨楚南北歲飢買米平糶乃獲倍息歸之於兄無私蓄弟呂涯卒遺孤五撫之若己子所居鬱攸府君有別業不肯獨遷曰如孤姪何兄靜園卒屬其子西庚於府君西庚又卒覆翼其孤迄于成立曰吾懼無以見吾兄於九泉也兄仲韶卒無子以長子某爲之後勤學不祿實生萃乾隆癸卯科舉人繕書四庫館議叙知縣克秉府君之教以道自淑府君晚而好道孜孜于善周人之急病予之藥死則施棺助窆自奉褐衣疏食而已齒雖耆凡祠墓事必躬親乾隆五十一年正月十三日卒年八十有一嗚呼可謂旄期稱道不亂者歟生於康熙四十五年丙戌六月二十二日太學生妻朱氏兵部主事泮功女子三女二孫十二曾孫十二某年月日葬於某銘曰

歐餘蒨瀛餘不泚泚鬱霞流英津其根莖以擊爾佳城

知足齋集

誥授奉政大夫護理浙江溫處兵備道溫州府同知江陰敬軒章公墓誌銘

呂星垣

有卓然無愧於君親而賚臣子不盡之志者其奉政大夫敬軒章公也夫公諱全節

字來鰲先世自建州徙江陰祖諱玉樹康熙壬午舉人任上元縣教諭父諱士鳳由孝廉歷官台灣知縣母陳氏封宜人未舉子以兄士麟次子爲嗣卽公也少治舉業甚工顧好因公九章學成未護雋援豫公事例選授直隸安州知州擢西路同知終溫府同知年僅五十而卒當公父任台灣令時以隔重洋不備幕賓召公往查前官報盜案全案擬辟公察其枉力請追回量減三人公父居官廉有政聲臺民愛戴公獨綜幕政故吏事臺俗習械鬪頂兇公請嚴治以法俗不變會地方荒歉公父動常平倉穀賑貸監司以初未與商且忌其廉勁遇事掣肘公父抑抑卒官公服闋官安州一秉父訓凡爲民奮不顧也州界趙北口下流貫溢爲患而淤沙淺河復無以禦旱乾隆辛巳壬午水旱洊飢公先後請奏明賑恤卽以工代賑復故河道全活無算嘗因捕蝗虔誠禱神蝗遂滅州有民婦誣其叔致兄死者不得屍所行野得之具得嫂奸狀有殺人以錐無兇名者故爲治解召匠廉無錐者詰之立伏於是制府能之奏擢西路同知轄境當神京重地五方輻湊尤易藏奸公督捕有法民得安堵時剪辦案起窮治其黨輾轉遁供詭稱崖穴屬邑逮繫無辜公廉得其情每予省釋都下傳言大房山匿亡命奉部檄飭搜捕山險峻甚委員多自崖返案久懸公獨步行引繩上兩易履皆穿於山巔僅見孤廟老僧白於上官案始結屢治道扈蹕賜克食大

緞貂皮異數也方奏擢河間太守因丁本身母艱回籍守制起復以原官同知溫州公治溫一如安州西路時嘗攝永嘉篆三月訖結三百餘案却巨金者再溫民至今頌之是年兼署郡守護道篆大吏夙重公旋委量海寧沙地海濱彌月積受颶風因之得口口疾嗣督運赴通路卒津門官民莫不太息公天性肫摯事親盡孝嗣母晚得風疾苦嗜臥廢公視疾不解衣者半年嘗因病劇割左臂和藥以進立效每忌辰設奠涕洟跪起終身如之初公父由招收場大使遷遊令屢召公公戀二母未赴及嗣母歿召赴臺乃往迨父沒扶襯歸族人或疑有宦囊公盡出行笈及父手作分書示之明父廉也而於兄寡嫂弟姪則友愛無弗至公身長玉立瞻視厚重有威嚴而待人推心置腹豁達大度惟於君親間畢生有欲然不盡之志臨終命長子研曰勤讀書以畢吾志其可傷也哉配周氏封宜人側室齊氏子四研榛李燾以某年月日葬邑某鄉某阡銘曰

惟志砥節惟節用才勵精履潔顧名全歸清勤迅發昭質不回迺阻專郡奚言登臺家國遙訣津舟低徊廿載封穴廉不可爲孝子竭力負土一坏銘幽泐碣詒清將來

江陰
山譜

誥授中憲大夫江蘇松太兵備道桐城淮樹章公墓誌銘

姚 鼐

君諱攀桂字華國一字淮樹先世自建州浦城數遷而居桐城十餘世至君祖諱紹七考諱天祐皆以君貴贈中憲大夫君歷任甘肅渭源知縣威武知縣江南鎮江府知府江甯府知府蘇松督糧道松太兵備道其在甘肅年甫三十強果任事獲久捕巨盜總督特奏其功引見純皇帝甚器之命擢同知總督未及擢上已特命知鎮江府旋以才優調首府君博知天下利病所蒞官興廢多得宜而尤明於地形勢純皇帝屢南巡狩始皆自鎮江陸行至江甯詔改通水道大吏使君相視衆初謂昔吳陳勳鑿句容破岡瀆下達毗陵六朝因之隋始廢今可復也君往來察之以爲句容茅山岡石巨勢高鑿之極難縱成瀆非閘不可儲水其勞費無已不若從上元東北攝山下鑿金烏珠刀鎗河故道以達丹徒工力省而後修易可永爲利大吏如君議上奏命君監修君鑿瀆百里旣成謂之新河御舟行甚安而數十年至今商民率避大江之險行新河君之力也純皇帝嘉其能故君方以糧道被吏議而上巡至卽以松太授君君好士獎善樂施予自鎮江江甯及至松江興理書院撫恤嫠人多賴之乾隆五十年安徽大眚桐城尤甚君時在松太聞之出萬金以救飢者又以糴穀以賑必驟長市價乃先於他處購山芋玉米數千石運至所全活無數旣而又爲疫死者葬埋君平生惠閭里族黨之事甚多而茲其最巨其時君妣黃太恭人里居哀飢

者多所救恤君迎養不肯往遂請告歸太恭人時健甚然逾年遂卒人謂早去官而獲送終亦其孝也自是君不復仕或里居或居金陵時鼐主鍾山書院錢塘袁子才於金陵城中作園林甚盛麗丹徒王禹卿時來遊與君皆有聲伎三君每召聚賓客遊讌鼐亦與焉然君及禹卿皆內耽禪說事佛甚精子才時譏之二君不以易也六七年間子才先亡鼐歸俄聞禹卿喪今又失君矣余悵然寂處追思昔遊一往真如幻夢然則二公之歸心釋氏庸爲過乎君卒於金陵豫尅期辭交好以嘉慶八年十二月二日卒年六十八嘉慶十年六月某日葬於懷甯西馬鞍山之北麓夫人先後皆吳氏子維極候補知府維桓乾隆己亥科舉人兵部武選司員外郎女二孫四子才禹卿之卒鼐皆銘其葬矣今君子請銘誼不可辭銘曰

趨世工而建有功殖財豐而能濟窮生也憂樂與世同超然一往遊虛空書其可稱以飾終寥乎趣向誰能窮

惜抱軒集

誥授光祿大夫太子太保予告文淵閣大學士兵部尙書軍機大臣仁和章文簡公墓誌銘

龍汝言

道光四年九月丁巳文淵閣大學士章公年八十薨於杭州臬國私第十月甲申遺疏聞於朝皇上軫念耆臣恩卹如例賜祭葬諡文簡凡所以飾終之典靡不備焉越

二年十月公子坦卜公兆於玉泉山麓寓書都下以誌墓之文爲請按狀公諱煦字曜青姓章氏別號桐門其先系出唐封世居會稽曾祖諱大賓遷杭祖諱名選考諱廷梲皆贈如公官曾祖妣邵盧張祖妣鍾妣吳皆一品夫人同產四公其季也幼而穎異長通經世之學乾隆三十七年壬辰成進士釋褐內閣中書乞假歸省丁父憂服闋以原官充軍機章京嗣遭母喪既除升宗人府主事丙午典試雲南己酉分校會試遷刑部員外郎壬子典試河南癸丑分校會試其秋視學陝甘嘉慶元年改山西道監察御史己未復充會試分校擢太僕少卿轉大理少卿特旨仍在軍機處行走蓋公入直樞廬二十餘年練習掌故簪毫視草矢慎矢勤故有是命而公自此受特達之知內而歷躋卿尹端揆綸扉外而開藩建纛屢權大府其間乘軒持節徧馳域內以求民瘼讞疑獄至於垂老乞身之年思一息肩而不得者咸於是乎基之矣自時厥後赴雲南鞠案遂往川陝兼軍務善後事宜還升太僕卿府尹順天十年出爲湖北布政使洊升巡撫旋以刑部侍郎內召復奉命往雲南鞠案授貴州巡撫調雲南兼署雲貴總督十四年晉都祝釐未至署貴州巡撫調江蘇署兩江總督年衰乞內用仍授刑部侍郎十八年九月署直隸總督弋獲林清案內助逆首惡馬克善聖心嘉悅加太子少保銜公子挺署東昌府知府是時亦以軍功賞戴花翎秉公訓

也十九年甲戌充會試正總裁隨往查辦金鄉案先是署直總督時升授工部尙書調吏部故命以尙書暫署山東巡撫是年十二月協辦大學士次年赴湖北廣東江甯安徽等省訊案卽署安徽巡撫二十一年回京調禮部尙書軍機大臣上行走調刑部仍管禮部時年逾七旬自奉命滇南十數載以來輶車星駛動經萬里奔走頻年瘴雨蠻煙棧雲隴雪寒燠之或非其宜飢飽之或違其節加之所到之區所治之事無不并心一力勞形瘁神而公亦用是致疾矣二十二年開缺調理病愈以協辦大學士尙書銜兼管順天府尹事尋授兵部尙書經筵講官二十三年三月眞拜文淵閣大學士管理刑部二十四年元旦晉太子太保銜是冬疾大作屢疏乞休溫諭慰留明年復請乃許之馳驛回籍甫數月驚聞睿皇帝升遐奔叩梓宮皇上知公老病仍許還山方謂怡志蠲疴期頤可卜迺自解組歸田優游林下者纔四年耳夫何溢逝之遽也公生平當官任事一以實心爲本綜覈庶務審慎精詳雖案牘填委而從容料簡無不就理晚年位益崇望益重敷歷中外貴極人臣而未嘗久於其職惟撫吳幾及三年善政留遺至今吳人稱道之其撫滇撫黔撫皖撫山東凡所設施皆未竟其緒卽當軸亦僅年餘未足盡公之蘊良可惜已然公長於折獄明允矜慎有古欽恤風凡獄多疑賢久懸莫決者仁宗命公行而公所至必得其情無枉無縱書

曰明於五刑以弼五教民協於中時乃功其公之謂與元配陳氏封一品夫人次配陳氏卽夫人同懷妹皆先公卒子四長圻早世次埏廣東南澳同知丁公憂歸哀毀卒次坦江西候補州同次塤候選通判後於世父以公薨之年先卒女三孫七長鎬一品廕生錚鈞錫麟錫壽錫桂錫芝降服孫二銘鏢孫女八公起家中翰歷踐台司恩禮際遇之隆行誼事業之美具載國史本傳及公門人前戶部尙書潘公世恩所撰行狀後之人可考而得其詳茲惟叙述官閥畧爲論次亦以見公之梗概云銘曰玉泉之山高崔嵬蔥蔥鬱鬱氣佳哉妥公靈兮山之隈御碑穹隆兮屹墓前名垂不朽稱大賢公靈永宅兮世澤長延

者獻類徵

誥贈資政大夫湖北鹽法武昌道候選州同廬江深源章公墓誌銘

鮑桂星

先生姓章諱正濤字同山號深源一號竹齋候選州同知累贈資政大夫先生少讀詩書有精識善處骨肉門以內無勃谿風自惟家世忠厚慨然以濟物爲己任乾隆乙巳歲大稜死亡相屬於道先生時家居傾橐而爲之助其戚屬里黨待以舉火者無慮數十百族而先生之心未已也又與諸薦紳議計畝出貲按戶給食邑之人賴以全活者無數先生謂家人曰是役也吾宗人幸免爲溝中瘠然天災流行國家代

有欲使永無顛越必如范氏義莊而後可吾嘗讀錢君倚所爲義田記心嚮往之今愈不能已矣用是早夜以思儲田畝定規則將以其暇日次第舉行未幾而先生疾篤易箴時願二子曰吾生平志在義莊雖規模粗具然非請官備案則不能垂久遠小子志之今長次兩子捐置義莊家塾秉遺命也先生之能踐大義若此又嘗以故至江南地名大通適居民不戒於火燼其廬者頗衆時鄉人載麥一舟至先生以價得之盡舉以給被焚之家此與范堯夫事相類而吾謂更難於范者范於曼卿爲故舊而先生所施則渺不相涉之人也蓋先生宅心仁厚所在有益於人固不獨居家爲然也其他善行如倡修家乘栽植士林難以更僕數今其家一門孝友仕者有政績可稱學者以文章名世亦以見先生之流澤孔長矣先生世爲閩人自宋大中大夫諱瓚初遷廬江世有潛德考諱可鍾鄉飲賓貤贈資政大夫妣氏徐貤贈夫人兄弟二人先生其季也壽五十有六卒以嘉慶丙寅年九月初三日配氏徐誥封夫人子三廷樑署理湖北布政使鹽法武昌道廷樞早世例贈朝議大夫廷榜候補道前刑部廣東司郎中女二適名族孫八煒瓊均道光辛巳科舉人候選郎中瑤候補鹽運司運同雲錦候選布政司經歷平候選布政司理問焯燿琅均幼曾孫三邦裕待選府通判次華壘以道光壬午年八月二十四日葬於東鄉之東渡嘴次子樞祔長

子廷樑以狀來乞銘因條其概而志之繫以銘曰

治山之陽粵有名賢積善於家隱而不宣及公既往義莊乃建族大不飢胥克用勸繼世勃興公之穀貽受祉既多罄無不宜乃卜高原有子同域銘以揭之此石不泐

廬江譜

誥贈中憲大夫崇祀鄉賢金華榮齋章公墓誌銘

俞樾

國家當隆盛之時非特朝多君子也其布衣章帶之士亦必有孝弟著於閭門至行立乎鄉黨者雖抱淑守貞不聞於時天必將厚其積而發之於子孫以大昌其家烏乎此吾所以銘榮齋章公也公諱大豐字士玉榮齋其自號也浙江金華人生有至性七歲入鄉塾師爲說論語入孝出弟之義輒有感發出告反面動如成人家故清貧無菽水之資慨然曰瓶之罄矣惟罄之耻雖微毛生捧檄之望敢忘仲氏負米之義乃以舞勺之歲棄儒術習會計以養其親一日負甌石自外歸飢疲少憩有父老憫之曰孺子得無餒乎遺以糗餅粉餐公辭曰吾親未得食吾敢先諸力負而歸厥考啓和公不善治生念兒曹況瘁恒鬱鬱公每日必密置錢數百於父牀頭俾得携錢就二三老友遊飲爲樂或是日囊無一錢必稱貸以供之雖甌釜生塵而老人杖頭錢無遺也啟和公嘗貸宋翁錢若干千貧未有以庚也公錙銖積累數歲之久始

親負而還之宋翁曰吾券已燬矣公曰父命也卒償如數烏乎宋翁之不責償公之必償以成父志皆古君子哉公之事親也食必精鑿飲必清旨有珍果嘉穀必以饌凡賈所入必歸之親已有所需則請之無私財焉執親之喪水漿不入口者三日杖而後能起遇忌日必疏食尤篤於兄弟有妹爲母所奇愛既嫁公體母意餽問無虛日同產弟樸齋公自幼從公學賈教之書數晝食同伴夜臥同衾視寒暖問飢飽若慈母之於弱子然縣令張君手書誼篤壘篋四字顏其門欲以其事上聞力却之乃已樸齋公卒公已臥病外舍諸子秘不以聞疾稍間始聞之卽輿疾歸哭之其室淚盡繼以血曰吾兄弟相依六十年無須臾離今先我死我何獨生爲自是病益不瘳踰歲而卒公喜讀書雖服賈而一鐙一卷與老儒無異每讀南北朝及五代諸史輒廢書歎曰吾儕幸生聖明之世無兵燹之災休養生息皆君恩也宜如何圖報乎或謂草野微賤雖欲報無繇公曰循分守己勉爲聖世良民是卽所以報也鄰里鄉黨有壯不能娶死不能葬貧不能自活者皆調之歲大饑糴穀於多田之家礱而糶之如市之賈而陰溢其升斗之數冬日製棉衣三百襲以施寒者歲以爲常嘗曰必待力有餘而始謀濟人則終無濟人之日矣生平盛德事不勝舉其熟於鄉人之口至今稱道者有數事焉其一事公東郭外有地數畝栽柏樹百餘株歲收柏實十數石

一歲爲人私砍之守者以告公曰今歲饑饉是皆貧無食不得已耳勿禁也於是東郭之柏樹遂盡又一事公之隣某氏子以圃質於公公厚予之值歸其券明年復以質亦如之又明年復以質應之無倦又一事公里中有不孝子詈其父母公曰是豈性與人殊哉每見之必與言父母鞠育劬勞及人子事親之道又歷舉古孝子事實以告之越半載子不復詈越一載具酒肉養焉又一事公之戚某行年五十止一子將娶婦而夭投杖曰天平予之無罪也公曰君誠長者然嗜食牛犬或亦當戒乎某謹受教無何生丈夫子二公之言曰人以愛子之心愛親則孝子矣以愛身家之心愛民則良吏矣以責人之心責己以恕己之心恕人則賢人君子矣又曰農工商賈皆有益於人士而無益於人可乎在一鄉當思爲一鄉所效法在一邑當思爲一邑所效法使不善者皆化爲善此士之益於人也公所言皆中理解雖樸直無文可書而誦也公之子果堂太守纂集公遺書爲一卷曰誦芬錄今撮其大旨著於篇詩有之肆成人有德小人有造傳者又推本君德謂文王之德如此故大夫士皆有德子弟皆有所造成烏乎知言哉夫惟有聖人爲之君故久道而成化化行而俗美雖桑戶樞樞間彬彬多君子矣其父老既有君子之德則其子弟服習其教訓觀摩其行事謹愿者可以無過而其才智者則必能負聲振采大顯於世而其尤者至爲朝廷

音上會語
楨榦之臣盤孟鍾鼎焜耀無窮故詩又曰濟濟多士生此王國王國克生維周之楨我國家當乾隆之時重熙累洽比戶可封觀公之所爲而時之清平俗之休美可知也果堂太守以名進士爲賢太守得公教之深矣苟終身服膺而弗失則必且金榦玉楨爛然爲中興名臣其所造成豈可量哉榘生也後不及識公而兄林與太守同舉于鄉故獲在年家子之末太守不以榘無似以狀乞銘榘不得辭焉按狀公生於乾隆三十三年卒於道光十六年壽六十有九初娶方氏生二子曰幼殤曰倬雲亦早卒繼娶李氏有賢德嘗侍公疾衣不解帶月餘焚香祝天請以身代公愈而李竟得勞疾先公卒生子二曰倬標曰格格亦幼殤倬標卽果堂太守也道光二十七年進士由禮部主事轉陝西道監察御史授福建泉州府知府於是請於朝贈公中憲大夫方李皆恭人有孫男四人女七人曾孫男九人卽於公歿之年葬於縣東鄉之望府墩銘曰

雖無位而有公輔之器雖不豐而有濟物之功雖不食報於其身於其後人烏乎百世而下欲知公之遺澤視此銘

春在堂全集

勅授文林郎江西德興縣知縣績溪秋漁章公墓誌銘

胡湛

先生諱鴻字可儀號秋漁世居績之西關少勤於學年十八應郡試冠軍遂補博

士弟子員弱冠補廩食餼名噪膠庠道光元年援例貢成均赴北闈雖兩薦未售而聲譽已動長安矣比歸後設帳於歙之磻溪暨郡西之如意寺從遊日衆湛亦濫廁其間得沐化育丁酉秋始捷南闈會試後考取咸安宮教習期滿以知縣選用甲寅籤選江西德興縣知縣乙卯二月粵寇竄饒州德興一帶道途梗塞四月始抵任視事見地方蹂躪詳請緩征民獲稍甦旋以到任遲延被吏議遂解組歸仍授徒於邑之東山書院壬戌春爵相曾文正公戡定江南延辦采訪忠義局卽赴皖垣因服公勤勞在局六月而卒生平爲人質直守正篤信好學以六經爲根柢以史鑑爲經緯尤邃於漢唐箋疏至六書音韻亦盡通曉嘗著有周易管窺十二卷易緯二卷毛詩蠡測二十九卷鄭氏詩譜考源一卷說文正宗八卷三國志地輿考十六卷未及梓行遽爲賊燬甲戌秋先生從子洪綱以行述見示并云將營葬地且以墓誌相囑湛忝屬世戚初受業於先生父西岑先生繼又得列門牆從學日久知之最悉不獲辭自維譎陋無文未能鋪張揚厲闡潛德而發幽光亦以志泰山梁木之感云爾爰爲之銘銘曰

英英先生品潔行芳求志達道用行舍藏名山講學嘗坐高堂執經問字樂育無方策名筮仕忠貞自矢不爲祿榮不爲名市國計民生慮終圖始知幾其神不殆惟止

完璞握瑜神還太虛令儀令望以永終譽明德後達積善慶餘事觀繼起昌大門閭

績溪譜安徽
通志儒林

誥授資政大夫署甯福兵備兼糧驛道金華果堂章公墓誌銘 何璟

君姓章諱倬標字果堂浙江金華縣人先世由閩之浦城遷浙曾祖諱繼賢祖諱日
昞考諱士玉皆未仕以君貴並贈資政大夫曾祖妣錢氏祖妣王氏妣方氏繼妣李
氏皆封夫人昆弟二伯倬雲早世君爲仲弱冠補博士弟子員旋食餼道光癸卯舉
於鄉丁未成進士分禮部充軍機章京歷補精膳司主事儀制司員外郎郎中轉陝
西道御史咸豐九年授福建泉州府遺缺知府補泉州府調署興化府升道員歷署興
泉州再守興化兩權道篆所至民樂去後民思振文教設義塾建義倉恤孤貧革陋
規罷賽會禁械鬪賭擒盜魁十餘名捐資倡修嬰堂自城鄉至沿海各村收養至
七萬餘口又贖資購地爲義塚收埋無主骸骨萬數千具皆不具論論其犖犖大者
泉故有六里陂亘四十餘里數十萬畝之農田資以灌溉陂傾歲久旱潦交困奸民
絕流而漁因以爲利有議修者聚衆撓之君訪知其由躬自周巡延紳開導督率諸
鄉通力合作功過半矣奸民乘夜暗毀之君乃商請營員輕騎至鄉探續路徑若將

以大軍圍捕也者衆洵懼稽顙願助工自贖隄成五十三鄉之民懽呼載道閩下游徵糧乏鱗册吏胥持其柄弊百出南安尤甚額銀一金甚有索至十緡者民出納田產推割費尤不貲官不能治君痛斯民之久困也念丈量費無所出自封投櫃又難遽復計惟先革積弊限以定數竝推割章程顛若畫一違者論如律蠹吏歛迹民困得蘇君任興泉三遇災歛施賑平糶立法至密事速而惠周全活無算同治五年興郡饑有渠猾聚衆數千將乘之爲亂閩郡騷然君不動聲色夤夜派員率兵徑搗其巢擒其渠以歸是役也少或遷延地方不可問矣至今士民歌頌之興化悍俗類泉而鬥擄更甚黑白旗二黨日尋干戈時湘鄉左爵相宗棠勦賊回閩調馬步隊萬餘分駐各鄉以清土寇俘馘者日數十計君謂爵帥此輩非盡賊挾怨誣控展轉株累者皆所不免宜由府訊質分別治之庶免縱濫帥意猶豫君持之益力且以去就爭之帥改容婉謝如君言君悉心研鞠誅積惡者若干名釋無辜及情輕者先後凡千百人凡此皆遺愛在民口碑載道父老兒童類能詳述之者也所謂學道愛人者非歟君宦京十年宦閩二十年約己以儉而待人至厚撫愛孤姪逾於己出胤宗祠設義田贍戚族扶危濟急惟恐不及性淡泊不慕榮利座右置册自課功過數十年如一日蓋堅定之操自其未達時而已然矣余與君爲同年生奉命總制閩浙同舟之

誼得君力爲多方期君以重達之任而君竟以疾長逝豈不悲哉君生於嘉慶十六年四月十五日卒於光緒五年四月二十日年六十九娶歙縣黃氏誥封夫人妾林氏王氏丈夫子三皆嫡出長德蔭知府銜候選同知次德藻同治十三年進士兵部武選司主事三德華福建候補知縣女子子八嫡出者四林氏出三王氏出一皆配仕族孫男六景堂景善景仁景高景傑景禮今德蔭等卜兆已定擇日營窆窆具狀來告乃爲之銘曰

胡仕於閩而止於閩天胡使君僅福閩矧經綸之未竟胡撒手而歸真余爲同年復爲同寅斯人不作兮愴余心古之循吏兮今罕聞山靈呵護兮蔚松楸而長春

原揭本

誥授資政大夫國子監祭酒廣東學政鄞縣采南章公墓誌

劉秉璋

光緒建元五月初十日國子監祭酒廣東學政章公卒於官越八年公子廷翰等將卜葬於某山某原其弟子廬江劉秉章來撫是邦廷翰乞銘幽烏乎秉璋不文何足以銘吾師然誼不敢辭公諱鑿字醜芝號采南浙江鄞縣人先世固閩產一遷杭再遷紹國初有學化者始由紹之新昌遷甯波遂爲鄞人曾祖賢儀登仕郎祖堅父忠型並國學生皆以公貴贈資政大夫曾祖妣吳祖妣何妣洪皆贈夫人資政公生丈夫子三公其長也次鑿候選中書科中書三鑿同治甲子順天舉人官內閣中書公

幼岐嶷不苟言笑容貌若成人年十七補博士弟子員歲科試輒高等道光癸卯舉優行貢成均學使羅公文俊以國士目之明年入都應朝考旋考取八旗漢教習是年甲辰恩科中式順天舉人咸豐壬子恩科成進士殿試以第十卷進文宗顯皇帝親擢一甲第一名海內以爲榮庚申三月蕭山朱相國薦公品學兼優得旨上書房行走比秋西人擾京畿文宗幸木蘭公扈蹕屢詔南歸公頓首泣曰車駕未回臣不忍獨還上頷之公迭掌文衡初視福建學晝夜校藝無倦容所取皆知名士輿論歎然閩人輕生好械鬪公慎重人命商諸巡撫徐公宗幹禁革之俗賴以變提學廣東一如任閩時廣東多僻地罔知嚮學公勸建義塾十所教化遂行闔姓者巨賭也鳩多金博勝負歲進陋規以爲常公峻拒弗納並促巡撫張公兆棟飭所屬捕其魁置之法風迺絕凡督學政二典四川廣西鄉試各一分校順天鄉試一分校會試一閱試差卷一公篤內行在閩迎養資政公侍奉惟謹尋資政公以事歸逾年捐館舍赴至公匍匐星奔葬如禮居廬不忍去遭母夫人喪亦如之仲弟歿撫其孤如己子見者謂爲難能公恪守程朱之學嘗以自勉勉人官祭酒時浙撫馬公以袁正獻公從祀文廟請上命國子監會議公奏稱旨從之視學閩中集先儒事蹟纂閩儒學則一書鈔版流布爲多士式其他著述有望雲館文稿詩稿各一卷雙橋草堂講義語錄

各一卷兩漢三國蒙求一卷均未梓公以文章受三朝知由修撰擢右贊善歷侍讀侍講左右庶子洊升祭酒駸駸乎將大用何天迺奪公之速也悲夫公按試廉州回行至中途而卒詢其地蓋陳白沙故里云公生於嘉慶庚辰四月十一日春秋五十有六夫人張氏國學諱祥祉公女箴室尹氏謝氏子六長立泰先公卒次立清後公卒俱張出三廷瀚邑附生尹出四立沂亦後公卒五立涇六立潢俱謝出女一張出適慈谿咸豐乙卯科舉人刑部直隸司郎中馮本棠子煊運同職銜銘曰

於戲哲人朝野望屬云何騎箕而竟不祿惟公之少敏而能文對策殿上獨弁其羣惟孝友于公之稟性道繼紫陽公之砥行內廷儆直終慎且勤泊乎治外帝嘉乃勳其嘉維何維公校士鑒別人材心鏡如水公使於粵二豎爲殃人曰休養卒勞不遑易簣之日廉公按部公齒五旬公名千古明山峩峩甬江淵淵思公不見銘公之阡

望雲小館
文詩稿

誥授中憲大夫直隸宣化府知府績谿琴生章公墓誌銘

張佩綸

君諱洪鈞字琴生安徽績谿人曾祖錦文祖鴻緒父志慶仍世耕讀母沈氏有賢行君孝謹廉靖以母爲師服習儒先操履不苟同治十年貢於禮部又三年始成進士入翰林以編修兼史館與豐潤張佩綸最善閉戶讀書不委曲從俗間歲必歸省母

以爲常光緒七年大學士合肥李公請君綜北洋府事君無造次辨論之才而參署五年事有不至輒相啟告忠懇篤誠甚見親重十二年四月以勞授宣化府知府雅意本朝非所好也母督之行至則前政勞然君單車行縣盡罷餽遺供頓所部皆驚邊郡去布政司遠屯糧軍驛猶沿明舊吏窟爲奸君鉤考積牘一一摘發中其隱微責令如額不則具劾十縣爭市穀馬積弊以蠲宣化令夙驕不便君所爲君又舉其僕陰事輒更獄詞相誣君益窮治之令恐解綬去其虛囚色惻然使得盡辭不妄予杖出俸錢儲經史躬據案與生徒講說邊人士迺奮於學期年之間伐山通道詰盜懲淫邦俗從化治務存大體亦能樹惠愛得百姓歡心方條上便宜爲邊氓籌永利而君遭微疾以十三年十二月二十日卒官年四十六妻趙氏子四人恒豫恒謙恒頤恒復女適歙縣廩生汪福熙君篤於師友嘗受業於涇縣洪運使汝奎洪謫塞上徒步出關省之及守宣化佩綸先在戍所去郡百餘里輒屏車騎來顧窮閭歲時存問不絕或延至官舍妻子供具歡洽殷勤家寄涇溪頗饒竹木時懷止足之義期佩綸戍還君亦歸覲終隱天乎此酷遽隕中身歿未及一月二子謙頤均以毀卒頤婦洪亦絕阮死孤嫠僅存遠邇驚怛福善之理於君而爽吁可痛也恒豫來告將以某年某月某日葬□□之原惟佩綸知君其忍不銘銘曰

酷吏之酷如狼牧羊使君之來如渴得漿遂以勤死天視茫茫民則神之祠君學堂
雖折而壽雖晦而章銘幽載德爾後其昌

績溪抄譜

誥授中憲大夫贈知府銜福建補用直隸州知州前知霞浦縣事金華懋生章

君墓誌銘

袁昶

君諱德華字懋生一字佩實先世五代時仕閩居浦城以保障建州功號全城章氏
國初遷浙金華世隱貞曜祖諱士玉以孝友列鄉賢祠德清俞曲園先生爲銘墓考
資政公諱倬標道光丁未進士由禮曹歷官福建糧儲道贈祖考如其階子三長德
蔭候補知府次德藻同治甲戌進士兵部主事君其季也幼穎異侍資政公官京外
務劬學兼習吏事奉庭訓嚴命以鯁尹仕閩例凡官鹽曹者父子免迴避資政公蓋
不欲其遠離也君歷辦鹽課常溢額理詔安浦下莆田諸場綱悉皆疏暢先後大吏
均器之己卯丁資政公艱服闋以票運叙勞疏保奉旨擢知縣補用直隸州又以賑
案出力賞戴花翎雋譽益邁是年宰南平下車斷積案二百餘踰年馬江事起羽書
絡繹邨毗僞言數驚暴客乘機剽掠君外侍軍扉內靖里落詞滑徒羅冬狗等置於
法邑以安堵未幾大吏以浦城官銷滯鬻檄典該處鹽課局至則挾奸剔弊民商稱
便擢省局提調既去而鹽梟戕官罷市之變作有司遽白請勦大吏召君剖決君謂

事由激變吏所白非實狀遂檄君往治諭之曰若等非皆吾民耶吾來第禽渠魁三人若慎無恐民額手熟視察君果來遂散去已知建安恤木商爲鑄禁立石知詔安走馬塘民悍與大埔寨世相仇殺君曉以利害解散之知霞浦平反刁僧誣訐之獄凡所至不事鈎距而摘發如神士民畏服既去民咸思之君嘗督繕漳郡隄隄費半而鞏倍乙未海警未平大吏籌閩海形勢廈門特重奏撥八萬金築胡里山礮臺而難其人調君赴工所臺倚山帶海非面勢窪突銳角如法不足資守禦君昕夕駐山廠審墜形庀木石討論新式臺堡匠役勤惰立汰獎不旋踵時方盛暑出入風濤曝炙中役將藏而病猶力疾督工或勸少息應曰王事也不敢告勞竟積瘁歿於工次時光緒二十年六月六日也紀年五十有一大府以積勞奏奉旨予卹賜口祭葬贈知府銜蔭一子入監於戲君志貞淬清亮有聲閩疆方將大展厥施而其志未竟朝廷之褒榮逾格亦足爲百吏勸矣君母黃夫人年九十餘神明不衰配程恭人福建候補知府山陰諱夢齡公第五女子三長景楓光緒辛卯舉人福建在任候選道連江縣知縣次煦春勵成孫男二崇品仲民景楓出君既卒之口年將復魄於口口之原景楓以昶與君次兄藻爲丁卯齊年狀來請銘以內諸幽余維君先世有惠澤於閩而苗裔仍仕閩爲廉吏公侯子孫必復其始後嗣之碩大以蕃庸有艾耶銘曰

末學觚園而君以方祗也居家理故可移於官也以死勤事利賴及民而身殫也我
銘幽宮名不刊也

金華抄譜

